

乾隆淮安府志

淮安府志人物序

古之作地志者類不兼人物禹貢一書爲地志之首所載第山川物產貢道而已至海內先賢益部者舊等傳則又專志人物與圖經輿記不相涉人與地各有所主也惟晉世擊虞作畿服經自分野封略民物先賢靡不悉具後之作志者宗之淮安濱湖負海三古之世人才不見于經傳秦漢以來英詰挺生嗣是而後彬彬盛矣顧郡縣稱名累代更易史書地貫各隨時制漢晉之所謂山陽人隋唐之所謂淮安人皆非此地二龔之爲楚人非此地之楚八公之在淮南非此地之淮名同實異

疆域判然又每見他書稱陳球爲下邳人稱陳琳爲廣  
陵人似皆與淮無與及考范書本傳則郡縣並舉下邳  
之下更稱淮浦廣陵之下明日射陽下邳廣陵非淮而  
淮浦射陽則至今並屬斯郡使非按時以稽其地分地  
以考其人不失之龐雜則失之掛漏二者交譏曷以傳  
信來世今雖舊志具存不無遺憾于是考之全史稽之  
文獻志叅之兩朝實錄備草諸書又廣徵各家碑版誌  
狀分爲孝行忠烈仕蹟儒林德義文苑而隱逸流寓方  
外方技亦附列焉事取核實不貴辭繁志在表揚不兼  
諷刺雖一方紀載無闇金匱石室之藏而他日詔開史

局搜訪者英亦未必不可備采擇于萬一云志人物第

二十二

淮安府志卷之二十二

孝行

孝爲庸行其事起於問寢視膳先意承志以迄於立身揚名明天察地之大從未聞割肝剔股以爲孝也昌黎韓子有云苟不傷於義則聖賢當先衆而爲之倘不幸因而致死則毀傷滅絕之罪其爲不孝更甚而後世乃往往有之朝廷亦因而致旌是蓋匹夫至性發於不容已夫聖賢之所制者義也愚民之所發者性也蓋由不學而致而其志固可憫國家用以風厲末俗或亦大道之所不廢歟今叙淮郡孝行以徐

節孝爲首有合於聖賢之道其餘以類相從而刲肝  
剔股諸畸行則另爲一編附其後俾知孝之所重在  
此不在彼云志孝行

宋

徐積字仲車楚州山陽人父石以神童舉知羅城縣事  
有聲積孝行出于天稟三歲父死旦旦求之甚哀母  
使讀孝經淚落不能止應舉入都不忍舍母徒載而  
西以父名石終身不用石器行遇石則避而不踐日  
休然傷吾心故不忍母亡水漿不入口者七日廬墓  
三年臥苦枕塊衰絰不去體雪夜伏墓側哭不絕甘

露歲降兆域杏兩枝合爲幹終喪不徹幾筵起居饋  
獻如平生州以行聞詔賜粟帛元祐初近臣交薦乃  
以揚州司戶叅軍爲楚州教授居數歲使者又交薦  
之轉和州防禦推官改宣德郎卒年七十六賜謚節  
孝處士官其一子

王彭吁始直濱人少喪母元嘉初父又喪家貧力弱無  
以營葬兄弟二人晝則傭力夜則號慟鄰里哀之戶  
各出夫力助作輶輶須水而天旱穿井數十丈泉不  
出墓處去淮五里荷擔遠汲困而不周彭號天自訴  
如此積日一旦大霧霧歇輶竈前忽生泉水鄉隣助

之者並嗟神異葬竟水便自竭太守劉伯龍依事表  
言改其里爲通靈蠲租布三世

南史孝義傳載彭爲盱眙直賚人故今泗州志載  
彭而淮安志不載按宋書地理志直賚屬盱眙郡  
南齊書地理志前一條盱眙郡下領縣五有直賚  
縣後一條東平郡下領縣二有淮安縣註云割直  
賚破釜以東淮陰鎮下流雜一百戶置是直賚在  
宋雖屬盱眙自齊以後卽割屬淮安直賚在今亦  
未能定知當在何地大槩沿淮不遠與淮陰接壤  
疑在武家墩高家堰左近屬淮安府境內無疑孝  
子正是山陽人所  
當補入郡志者也

元

穆謹淮安人居殘廬墓嘗表其間并復其家

舊志不載見續

文獻通考今增

明

朱阿金大河衛人永樂十六年禮部奏其孝義賞鈔千  
貫米十擔旌表其門仍免差徭

宮安山陽人父早喪母改適北商安長遊郡庠宣德間  
以貢入京避雨店舍店姬問安知爲淮人因反覆詰  
問姬正其母抱持大哭不忍舍時相別逾四十年母  
已生三子欲迎養不能去于是往來定省不缺入選  
授溫州府推官陞廣東按察司僉事以清慎勤敏稱  
致仕歸囊橐蕭然家徒壁立杜門却掃不問戶外事  
貧無生業恒牧豕以資薪水有司歲取其一供祀事

都御史王竑過其家叩所以爲生安以實告竑深加嘆異詰責有司有司曰不知其爲僉事家竑曰不知爲僉事僉事尤可重矣

舊志在仕績通志  
移入孝行今從之

楊顥字克彰山陽人自幼事父母孝父早世哀毀甚母慰解之卽強顏以悅母而哀不衰母嘗病晝夜未嘗安寢母歿哀號頓仆水漿不入口者數日及葬廬於墓側衰絰不解晨奉櫛盥夕奉浣濯如生時哀號之聲聞者感動有司以其事上聞旌其門以子理貴累封工部侍郎知府徐鏞附木主於鄉賢祠配享徐節

孝

王鉉山陽人十歲已知孝養祖父母患風疾鉉朝夕侍奉湯藥祈以身代祖父母歿廬墓三年父母沒亦然成化初郡守楊景上其事旌表其門

王僕字汝翼歲貢生其先固始人元末有爲清河令者因家焉正德中仕灤池縣學敎諭奔母喪哀毀幾絕繼爲濟寧州訓導所著四書義濟人傳誦之

陳寶鹽城人親沒廬墓三年不與妻面惟命子以薪水餉

李昇山陽北辰坊人天性至孝幼喪父聞人稱父名輒

哭不輟聲事母不離左右教授童子以養母甘腴備至母卒哭泣過哀喪明每朔望必展墓哭奠雖家居苦塊於別室者三年自是終身不肉食邑人皆稱貞孝子

周熊淮安衛指揮使父伯亨母梁氏早世事繼母李以孝聞及沒建思親樓於中門外刻像其中朝夕奉祀出告反面時祭薦新太僕少卿顧達序其事

樊琦字克用山陽人成化戊子舉人授利津縣敎諭補平原敎人有規士林敬服典山西文衡藻鑑公明生平無妄交居家孝友凡祿養餘資推濟族屬無留餘

者卒於官

朱仁桃源陸城鄉人嘉靖中歲貢生選於渭縣學敎諭性至孝方娶父賓病躬調湯藥絕私室不入及卒結廬墓側單衣跣足隆冬不易時有芝草產墓上正德九年旌表

蔣彬大河衛人母張氏得時疾汗閉幾死彬倉皇無措自以艾火灼臂願天母忽汗出獲安執父喪哀毀特甚旣葬廬墓晨昏哀泣如初喪晝有二鳥飛鳴廬中夜有數犬往來廬外若爲司夜太僕少卿顧達傳其事士大夫多歌咏之

楊錦號朴菴山陽人歲貢生母病侍湯藥衣不解帶者  
三月父鶯鰣居依父寢處十餘年不入私室每冬日  
父足凍裂以舌舐之父患廁病嘗其糞嘉靖中應貢  
入京以父老不忍離竟不仕其應給銀幣因不謁選  
辭之父鶯年九十五飲於鄉取定向督學江南夢神  
語之曰楊朴菴孝子也及按淮詢知爲錦驚異因表  
其門且授以職一時以爲至孝所感云

嚴性字子心山陽人禮部儒士父母繼逝廬墓六年母  
畏雷每天雨震電必伏墓以泣暴客屢刲忍死不去  
太守五嶽陳公親詣墓所延之歸例當銓選廬孀姊

無依竟不赴後太守高公聘飲於鄉

舊志載性於隱逸傳按其事實廬墓六年間雷伏

墓其爲孝行昭然無疑特不赴銓選合於隱逸然

按其重輕不可以彼易此

徐在安東人嘉靖末遭水患負二親流寓板浦業醫覈食貧不能娶井自操父母歿出反必告年五十孺慕之心不改萬歷二十二旌表從安東志補入

沈維中山陽人萬歷中歲貢生選餘姚縣縣丞陞荊州府經歷維中父早世事母至孝母沒哀毀骨立終其身飲食非薦不敢嘗遇忌日輒號痛竟夕事兄如父嫂悍曲處之撫兄弟子解推備至與弟維貞旣析箸

復合閉戶讀書終身不與外事

維中舊志載在仕績傳中按傳雖嘗歷官縣丞經歷皆無事迹可考所載多孝友事移入孝行爲是

王久章字汝渙淮安衛人萬歷癸酉舉人歷官河南府

通判久章幼孤感母氏苦節乃勵志讀書博學強記

文采煥如歷仕有聲所在標政績尤以名誼自持挂

冠歸盡以其財折諸弟姪孝友之風尤足稱云

按舊志云選河南別駕令江以西守河以北是久  
章固常爲縣令及陞郡守矣乃徧考新舊志及實  
錄備草俱但書其河南通判不知其  
令何縣守何郡也俟考出當更入

吳從衆字心謙清河人萬歷中邑庠生性至孝家夜被  
火母熟寢衆冒烈焰入寢所負母出身糜爛且死尚

問母無恙否衆卒母越一日亦卒巡按御史具其事上聞建坊旌表額曰焚軀孝子

成瑤鹽城人年十七喪母寒暑哀切廬墓三年妻病殞亦不返顧

孔金山陽人父椿母謝氏椿死遺腹三月生金幼有孝行母被大賈杜言偏娶投河死金屢訟不勝言以賄謀欲斃金金乞食走闕下擊登聞具奏不得達復走歸廬墓所晝夜哭不輟聲里人劉清等上其事太守張守約異之召隣里媒氏並置對吐實擬言斬未幾張卒言資緣得脫金復號訟不休被築無完膚撫按

復理舊牘仍坐言斬死獄中金涕泣終身貧老垂死  
推官曹于汴署郡事聘爲鄉飲賓子良忠

孔良痛父金爲祖母艱辛備歷於其病刲股進羹以療  
之母喪哀毀廬墓一如其父萬曆四十三年巡按王  
九叙具題同父旌表

孔忠母死葬畢朝夕走墓所掃棘上食涕泣祠像前及  
父沒行事悉循其父敬長慈幼信睦有加尤以施濟  
爲務道府聞其事於撫按錫冠帶給米帛樹樟楔以  
旌之

舊志載金與良於孝行載忠於德義按忠傳亦孝  
子也父子三人當合傳以傳不當列於兩處典舊

本小異

朱繼輅安東人邑庠生生三月而喪父稍長每問父貌於母母哭輒亦哭母病湯藥親嘗顛天求代母沒哀號不已遂喪右目萬歷十三年旌表

朱昂安東人四歲喪父依祖父母祖年九十有八病篤而無子昂爲生養死葬焉萬歷十八年旌表從安東志補

吳松山陽人性淳謹早失父廬墓三年奉母以孝聞母壽至九十而終有孀婦養之終身以全其節撫姪以存兄裔拾遺金還其主施藥修路尤多善行知府詹

士龍聘爲鄉飲賓

盧賢安東人事母盡孝結廬墓側水至不忍歸棲浮筏者三年萬歷間舉孝行從安東志補

井國光安東人生三歲嗣伯父田母王氏守節撫孤漸至成立家被火母覆屋下光入烈燄中負母出毛髮不焦人咸異之母沒十餘年每言及悲不自勝弟沒養弟妻薛氏以成其志巡按饒京題旌之從安東志補

胡一炳侍郎璉之曾孫舉人應徵子郡庠生父母沒時在襁褓稍長知爲藁葬卽卜地更厝倚廬三年哀毀如新喪有雙鵠徘徊墓側人謂孝感所致撫叔孤女

嫁之未幾寡無子復携歸養之全其節有寡姊盧無  
子亦養之二十年死厚斂之而歸其資於盧買妾得  
吳氏詢之孤也遣還之不索所聘金

張以中號小樓山陽人事寡母極盡孝道代兄子赴獄  
無怨色弟欲分箸涕泣諭之曰今如此負亡母教訓  
矣士紳重之子應錫崇禎癸未武進士

段繡袞山陽人沈邱丞有成子有成卒於官母吳氏扶  
柩歸繡袞其遺腹也比長刻志讀書事寡母盡孝兄  
華袞性豪邁盡廢其產繡袞旣析箸亦並廢之號兄  
所爲始終不失弟道

梁秀鹽城人早喪母父憐之不再娶秀朝夕色養父歿  
廬墓離家數十里夜有鬼物試之不爲動終喪族人  
羣往迎歸揭卧薦起有赤蛇數十盤旋其下衆驚異  
有司上其事詔旌之從通志補

張致中山陽人天啟中以孝旌

舊志不載見通志又文苑中別有一張致中似非  
此人此天啟間已被旌典彼崇禎中始出貢也

楊時蕃山陽人天啟中廩生父母早亡祖母王氏撫育  
之王病危篤禮斗祈代時方溽暑供水成冰異香勃  
發進王飲之立愈郡守聘修郡志潛遣人以百金貽  
之云某令求入名宦峻却之越數日復請如初終不

應揚州鹽漕內臣持多金求作魏監功德頌亦堅辭  
之史閣部可法卑禮延之不見可法歎曰子羽先生  
今再見矣卒年七十二所著有四書說毛詩解古今  
辨瑣行世子會孫杓皆諸生

田富可桃源人性篤孝兄弟二人兄家頗僥富可爭養  
其父晨夕省問安否飲食必經目然後進父或以他  
故撓心必多方曲解俟其齊容然後已否則終夜不  
成寐鄉里稱爲純孝

馬士發山陽人家世治鐵爲生八歲父病脢無力延醫  
乃禮斗求代誓蔬食終身父病隨愈父好飲日必以

酒進且笑談嬉戲以娛樂之或酒錢有缺必多方營辦否則以米易酒寧夫婦忍饑而歡笑如故歷年不輟

郭璋山陽人天啟間庠生以孝行奉

旨建坊旌表勅額孝義之門在新城東門大市口今遺蹟

無存

吳珊字崧三山陽人崇禎中邑諸生涇南先生第三子性至孝母病危篤時方隆冬珊夜奔神廟裸身跪禱家人不知也母忽甦曰適至神廟見珊兒跪請神不允吾不起矣家人急往尋之尙跪泣不已其孝感如

此鼎革後不出應學使者試與兄瑰瑩皆同日除名

殷輅鹽城人庠生念母老不能離左右遂謝諸生籍母病衣不解帶湯藥必躬奉母沒哀毀骨立廬墓三年

從鹽城志補

蔣勵鹽城人父潮子稷三世業醫爲醫官勵性孝少嗜飲父憂之勵卽斷酒不飲母卒痛父鰥居伴父寢處不入私室垂十九年稷事父亦篤孝歲歉多病者以

藥餌活人無算

從鹽城志補

徐誠鹽城人早喪母事繼母張氏恭謹承歡歷五十七

年未嘗有忤色

從鹽城志補

李挺生鹽城人諸生四歲失母事繼母姚氏阮氏誠敬備至鄉間無間言于公私亦有義行

從鹽城志補

宋蘇字眉長鹽城人鄰火延燒居室時親柩在堂惶急無措伏棺號泣願與俱燼救者以絮被濡水浸其身及棺得不死崇禎初歲大兌於西城外得遺金堅守其人還之晚年以兄歿失偶寢食與共二十餘年未嘗一入私室

從鹽城志補

陸世卿山陽之廟灣人父喪事母盡孝代兄係獄及釋母已沒乃悲號赴墓所三年不歸服除遂祝髮爲僧稱白湧上人

從廟灣志補

王彥字士夫清河人方數歲值父牙醉寢彥侍左右扇之不去或招之飯日俟父醒又一日侍父櫛見白髮

卽泪下曰父老矣事母楊氏尤謹兄弟復敦友讓知

縣吳宗吉表其廬

從清河志補

卞孝子不知其名清河人世居河口性至孝曾割股肉愈母疾人因稱卞孝子年老矣家貧值其兄生辰計無以爲兄壽過牌上借人網網魚仰祝曰天乎與我一魚將以啖吾兄一舉得巨鯉馳獻兄喜復同至

河上放之歸而後飲酒

從清河志補

潘鴻漸字羽奇山陽人崇禎中郡廩生居父喪哀毀盡

禮家貧飲食或不給而奉母備極甘膳遊學揚州值亂作遂遇害族子夢麟字帝與亦以孝聞喪父哭泣不絕聲每食進饌如生時三年不與宴會不入內邑人稱之

周元相字左台山陽人天啟中邑諸生志行嚴潔動必以禮居外艱三年中蔬食飲泣如一日家貧授徒不得已過鄉塾悉麻衣冠行不苟隨俗易服其他酌應俱謝絕不與學使者至以文行兼優舉之

王國珍桃源人父魁武早故母陳氏守節撫孤國珍方在襁褓及長竭力養母母故葬張家莊大道旁每過

必備物以祭祭必哭終身如一日邑人稱爲王孝子

從桃源  
志補

國朝

張芳葵字獻赤山陽人順治乙酉舉人幼失母事後母以孝聞家貧衣食不繼處之恬然手一編每忘晝夜著禮記纂要行世

張璵若字虎公山陽人庠生父履貞宦閩時值鼎革南北阻絕璵乃航海赴閩遇颶風覆舟不死奉父將歸適大兵入閩貝勒王考授南靖縣學教諭掌漳浦縣事多惠政以親老辭歸至浙巡撫張存仁強授

之以天台令又以親老思歸堅辭之

張我聰

未詳縣人

性醇篤孝事二親父沒養庶母如其母

友愛諸昆弟撫其遺孤使成立歲出粟賑饑當事義

之旌其門

王忱淮安人庠生母死日夜哀號遂以毀卒未匝月柩  
旁燕巢產白雛繞柩飛鳴人稱爲孝感所致多爲白  
燕詩以輓之

從通志補

劉源長字介祉山陽人庠生父宗遠任廣西懷集所吏  
目阻兵亂不得歸源長訪父跋涉萬里水陸所由屢  
經危險有風息虎馴之異咸稱孝感又祖母病篤刲

股愈之後祀鄉賢

從通志補

楊長蒼山陽人父病七載扶持飲食不假僕婢母死廬

墓蔬食三年

從通志補

嵇宗禹字玉書安東人康熙中歲貢生宗禹幼穎悟有孝行父母歿廬墓三年及掌教於豐課士有方有豪右逼人致死者力請上官按治如法卒後祀於名宦

從安東志補

陳其寬鹽城人家貧母病醫禱備至年三十喪妻曰吾幸已有子倘繼娶不善事母反爲所累遂終身不復

娶從鹽城志補

劉起龍鹽城人素性朴實善事二親遵母遺命養無嗣

姨母以終餘年知縣表其門

從鹽城志補

李鉞字繡持山陽人六歲而孤哭踊如成人比長家貧有食先奉母次及弟有衣先衣母次及弟不自爲計母病席地臥其側三月不解帶與弟鎧竊其糞嘗之母卒口餘鯀沫以舌吮之見者無不泣下

朱其輝字輝吉安東人父歿哀毀骨立廬墓三年河決祖父母柩被冲跋涉泥淖露處兩月卒得之而後已陳安國阜寧人少孤事母至孝值兵亂母病不能行一家皆逃散安國負母渡射陽湖避賊賊見而憐之不

忍殺母子皆免壽九十餘無疾終

戴大全阜寧人燭火延燒親柩哀號迫切風爲之反鄉  
黨異焉雍正十一年鄉人爲之請旌於朝

阮應韶大河衛人康熙中諸生孺慕性成孝養二親先  
意承志年十五喪母慘痛致疾遇父疾衣不解帶寢  
食俱廢父歿哀毀骨立喪葬如禮更篤於同氣撫孤  
姪成立賙濟貧乏終身不倦歿後崇祀鄉賢

毛聯芳字彥超山陽人歲貢生爲人醇正尤篤孝行父  
年八十疽發於背聯芳泣禱於天長跪終夕父夢神  
人授餅餡與吞遂霍然愈居母喪三年不入內室父

年老瘦瘠左右扶掖日夜不離絕不假手僮僕八年如一日及卒鄉人公舉其孝

成世雄鹽城人家貧菽水能承父歡父終寢苦枕塊不入內者三年盛暑不浴髮秃不剃府縣皆旌其純孝

從通志補

宋桓貽字以倫鹽城人母陸氏病背疽已殆忽不藥而愈未幾桓貽病沒父曹檢其篋得禱竈神疏稿蓋

祈滅已算以延母云

從鹽城志補

吳世昌安東人庠生生二歲祖中父相繼亡世昌孤露讀書成立奉侍祖母及母不去左右遇疾親嘗湯藥

額天祈禱無愧古人順治十三年旌表

從安東志補

胡之驥宋安定公後裔有孝行

涂其貴其華涂國相二子天性純孝事親先意承志曲盡子職居喪兄弟同廬墓午夜悲號淚以繙血不茹葷酒終制後每逢忌日執禮如初喪乾隆二年旌表吳廡昌安東人祖母與母並孀居祖母多病侍立不去左右親嘗湯藥衣不解帶人稱其孝

附割肝剔股

明

張住兒桃源吳城鄉人母孟氏病篤救療不效乃割脇下肉爲羹以進母病竟瘥洪武二十五年旌表其門凌鏗鹽城人父勝病亟鎗割股肉作羹以進父食之卽愈山陽縣李參政元有詩贈之見藝文

陳斗南鹽城人嘉靖庚戌進士事繼母以孝聞母病疽悲號七日口吮其穢卽愈

吳輔山陽人母李氏病篤輔割肝爲羹食之病愈

吳堂 陸寶 楊輔 蔣鵬 陸維藩 朱銓 楊憲

皆山陽人割股救親者

以上七人見隆慶志康熙志失載今依舊志補入

高士魁

未詳何縣人

父生員廷銓萬歷中患背瘡勢甚危篤

士魁割左股肉作糜以進瘡卽平愈後母病癆瘍復

割股飲之母亦起

張中徹山陽人廣平府通判張應節子母周氏病篤徹  
焚香告天願以身代引刀割左臂煎湯進病立愈

高鹿鳴字子賓山陽人郡增生母余氏病割股進羹愈  
之伯兄已割產產落又推與之挈弱姪俾有寢宇後

以子貴膺寵命終恬然無德色

舊志列高於仕績按高未嘗出仕亦無績可書也通志移入孝行從之

朱多順山陽人皮工也母病脢無力延醫乃夜起露禱以皮刀割肝煎湯飲母遂進飲食父病復刲股救之朱佐桃源人廩生年十八母病刲股煎藥母得不死崇

禎二年旌表

從桃源志補

趙有年

未詳何縣人

郡庠生父病痢醫者言須辯遺味甘苦

以別藥劑有年嘗之其純篤如此

王琪山陽人茂華子家貧事親不缺甘旨父病刲股和藥以進事兄如父撫諸姪如子中年家事漸裕施冬衣棺槨無算鄉里皆稱其賢

劉鑾

庠生

潘縉

劉璿

朱自正

楊廷相

李儒

劉炳

潘長富

張烈

陳範

王世泰

曾世傑

卞士佩

劉芳

三次割股

皆鹽城人

割股救親者

從鹽城志補

陳位

曾鐸

李建學

庠生

皆鹽城人

割股救親者

陳位

從鹽城志補

薛秋芳鹽城人王府引禮父病不瘥晨夜哀號兩目失明後復割股救母鄉人頌其孝

從鹽城志補

李登仕

庠生

高建勲

瞿毓秀

武副榜

皆鹽城人爲親嘗

龔者

從鹽城志補

孟之德

徐文炳皆鹽城人爲親嘗龔復割股救親者

從鹽城  
志補

周金鹽城人母病篤金悲號無計用刀裂左脇割肝和湯啖母立愈邑令聞之召至庭驗其跡旌表之

從鹽城  
志補

崇思賢山陽之北沙人母病痢家人厭苦之乃親爲浣滌且嘗其穢家人感泣母病尋愈

從廟灣  
志補

郭郊號雲廬山陽之廟灣人嘉靖中郡庠生母病剗股和羹以進母病遂瘳及父母相繼沒家貧未葬僅鄰火延燒將至郊室乃伏棺號泣風反火熄及葬廬墓六年山陽知縣周如山舉其行爲鄉飲大賓妻鄒氏

亦苦節三十餘年

從廟灣志補

王柱民

水國相

劉汝時

薛潤

居喻口

郭遽

唐培

皆廟灣人割股救親者

從廟灣志補

陳通安東人節婦劉氏遺腹子也性至孝母病篤三割

左臂以救之母壽八十七通亦壽八十四人稱爲節

孝之報

從安東志補

陳宏道安東人庠生年十三值父病焚香祝天割股以

進父病尋愈里人公舉表揚之

從安東志補

許可富安東人年十歲母孟氏病劇夜起割脾內煎羹

以進母病遂愈

從安東志補

國朝

張拱台山陽人順治中母盧氏病衣不解帶藥必親嘗  
剗股和藥以進母養愈父文鳳病家貧無資延醫禮  
斗告天願以身代父亦愈

張星弼山陽人母李氏病剗股愈之

陳嘉龍山陽人年十二母宋氏病剗股和藥飲之卽愈  
時稱爲真孝院道交獎之

張自宏未詳何縣人父謙年七十卧病一月宏屈膝延醫涕  
泣嘗藥祝斗剗股父竟獲安

曹廷秀廷球鹽城人同父異母兄弟秀於繼母病篤時

割股進羹方九齡亦割股以進羹年十二母又病

復割肝以療母

從鹽城志補

李廷栢廷機鹽城人栢割股救父機割股救母父母俱

享大年

從鹽城志補

左文運字天開山陽人父早逝事母盡孝母病創闌古有嘗糞可別凶吉者卽親驗之又連割股肉以啖母母果愈及居喪哀毀盡禮孺慕如生時妻趙氏亦善事其姑姑老病畏寒嘗解衣共寢以身溫之姑卒蔬食九年不茹鹽酪

陳愷山陽人十三歲時父病篤割股救之父尋愈

王孝清河人國幹子幹與其弟勲同居孝事勲亦如事  
幹年十三勲病劇孝侍寢泣下割股肉進之勲病遂  
起康熙初知縣周世璉旌其門

從清河志補

曹以誠字實夫安東人母病三次一割股一削乳一割  
肝皆應手愈父病嘗藥嘗糞備極誠摯父卒廬墓三  
年雍正四年知縣余光祖表其墓

從安東志補

趙夢龍安東人父煜母朱氏早卒繼母張氏撫育之順  
治中張氏患癰醫藥不效龍剗股和藥進之病愈院  
道皆加旌表

范斌字佑人山陽人有至性年十九當婚日母忽患病

急不可治刲股和藥以進卒不救越四年父病膈腹  
刲股旋愈而仍沒家貧竭力以事祖母色養俱至內  
外無間言

淮安府志卷之二十二

忠烈

士人處則孝其親出則忠其君蓋君父二者天地之大經也世有束身儒林名震海內而一念濡忍遂至敗其生平者往往有之淮郡所產自臧洪而下若劉壽州趙康州或死守封疆或殞身戰陣相望後先至宋之末造陸丞相全家蹈海節尤烈矣下此武夫弁卒廁身一命非有詩書禮義之教而致命遂志至死不變彼夫魏科顯仕受國重寄一旦蒙面忍耻甘爲敵人前驅雖復貴極富溢視此不有餘愧哉志忠烈

漢

曹竟事見漢書鮑宣傳

正德志無天啟志始列之忠烈傳首云見歷代忠義錄舊志不載按漢書鮑宣傳後有山陽曹竟云云五十五字此山陽與今淮安之山陽無涉漢山陽郡屬兗州此地在漢但名射陽淮陰至晉義熙中始改山陽郡凡漢魏之所稱爲山陽人者皆非漢人也舊志不載不爲無見陳公誤認後志遂相沿襲今仍依舊志正之見辨訛

臧洪字子源射陽人太原太守顥子舉孝廉爲郎補卽邱長靈帝末棄官還家太守張超請爲功曹洪勸超除董卓超然其言與洪西至陳留見兄邈計事邈大異之致之於劉兗州岱孔豫州伯皆與洪親善乃設

壇場方共盟誓諸州郡咸共推洪洪升壇操槃軟血  
而盟辭色慷慨涕泣橫下聞其言者莫不激揚人思  
致節頃之食盡衆散超遣洪詣大司馬劉虞謀至河  
間遇幽冀二州交兵使命不達袁紹見洪奇之使領  
青州刺史在州二年羣盜奔走徙爲東郡太守曹操  
圍張超於雍邱洪聞之徒跣號泣勒所領兵求欲撫  
超紹終不許超遂族滅洪由是怨紹絕不與通紹興  
兵圍之歷年不下紹令洪邑人陳琳作書與洪洪亦  
作書答之見藝文紹知洪無降意增兵急攻城陷男女  
七八千人相枕而死莫有離叛紹生執洪欲令屈服

見洪辭切知終不爲已用乃殺之

陳容洪邑人少爲諸生隨洪爲東郡丞城未敗洪使歸紹紹執洪時容在坐見洪當死起謂紹曰將軍舉大事欲爲天下除暴而專先誅忠義豈合天意紹慙使人牽出謂曰汝非臧洪儻空復爾爲容顧日今日寧與臧洪同日死不與將軍同日生復見殺在紹坐者無不嘆息竊相謂曰如何一日殺二烈士

南唐

劉仁瞻字守惠淮陰洪澤人父金吳濠州刺史仁瞻仕先主歷袁黃二州刺史進武昌軍節度使中主伐楚

仁瞻帥舟師克岳州撫納降附甚得人心周人有南侵之謀以壽州爲要害徙仁瞻爲清淮軍節度使周遣將李穀等帥師大入報至上下失色仁瞻獨部分號令閒暇如平時出兵破城南大柵殺周兵數千周世宗自將攻城雲梯洞屋下臨城中鼓角聲震牆壁皆動援兵屢敗仁瞻意氣彌壯周人憚盡其力竟不能下周兵多死世宗益忿坐城下督攻愈急仁瞻素善射引弓射世宗箭至胡床前數尺輒墮世宗命移床近前箭至數尺前復剽去仁瞻投弓於地曰天果不祐唐耶若然吾有死耳子崇諫泛小舟渡淮將謀

自全爲軍校所執仁瞻命腰斬之監軍使周廷構求  
救於仁瞻妻薛氏薛曰幼子固所不忍然貸其死則  
劉氏爲不忠之門促命斬之然後成服聞者皆出涕  
明年世宗復親征會仁瞻疾篤憤不知人周廷構等  
乃爲之署表請降昇仁瞻至幄前拜天平節度使兼  
中書令昇歸越三日卒年五十八州人皆哭偏裨及  
士卒自剄以殉者數十人薛氏不食五日亦死中主  
聞仁瞻死哭之慟贈太史中書令謚忠肅或言周亦  
加贈中主嘆曰仁瞻有知其肯舍我而受周命邪加  
封衛王後主立進封越王子崇諒從子崇峻宋開寶

中崇諒爲進奉使宋太祖嘉其忠臣之後命爲都官

郎中

張雄

前有南唐昇州刺史張雄別是一人或云李姓淮人中主時周師南

伐雄爲軍首領拒周有功歷遷袁汀二州刺史後義  
主嗣位進爲統軍仍守二州宋師取江南金陵危急  
雄謂諸子曰吾必死國難爾曹勉之時國被重圍雄  
糾兵東下以救之至溧陽與宋師遇猝與戰雄師失  
利父子俱沒于陣他子不從行者亦死于別戰一家

徇國凡八人云

舊志無據文獻志增入陸氏南唐書云張雄失其鄉里家世周人南侵淮南民自相結爲部伍以拒

周師謂之義軍雄所將最  
有功元宗命爲義軍首領

宋

趙師旦字潛叔楚州山陽人以叔父蘐試將作監主簿累陞寧海軍節度推官知江山縣以薦改大理寺丞知彭城縣遷太子右贊善大夫移知康州方兩月而儂智高叛來攻城師旦悉其卒三百出城拒戰賊少却命夫人取州印佩之使負其子以匿曰明日賊必大至吾知不敵然不可以去汝留死無益也遲明賊攻城益急左右請少避不可城破還坐堂上大罵賊遂遇害事平賜光祿少卿官其子覲右侍禁弟子試

將作監主簿又以其弟潤州錄事叅軍師陟爲大理寺丞簽書泰州軍事判官卒時年四十二

歐陽澈字德明靖康時應制條弊政陳安邊禦寇十策又上封事極詆用事大臣遂見殺死時年三十七所著有瓢然集六卷紹興中加封朝奉郎秘閣修撰官其後二人

按宋史載澈爲撫州人正德郡志載澈爲鹽城人蓋以朱子語錄爲據然語錄亦未明言澈爲鹽城人也朱子云熹族叔祖居高郵時一日使人往鹽城小村買物事乃云彼中三四日大雪叔祖甚怪之時八月安得有雪後人自彼中來問之果然乃歐陽死時也程國棟鹽城新志云澈傳末載豐城范應鈴爲立祠學中范則崇仁學官也其爲崇仁人無可疑者且楚州八月大雪史亦無其事布衣

與陳太學東枉死臨安非時之雪不降于行在所  
烏足以示天戒而警其君相哉故去之此說頗爲  
有識但郡縣志書載之已久鹽邑並入祀典驛行  
副削駭人耳目或者前人別有考證亦未可知始  
仍其舊而略爲辨之如此

劉晏楚州山陽人以氣槩名鄉里嘗與鄉薦紹興初假  
從事郎權本州錄事司時通判劉晏先以劉光世將  
敗降敵後擁兵復歸本朝命通判楚州晏大歎望殺  
太守晏諭以禍福時和好初成晏謀刲歲幣以楚城  
反綱運已抵城南晏策騎奔告綱運獲全晏知事洩  
執晏殺之閩門遇害

按舊志及文獻志所載皆同劉公晏但權本州錄  
事同未嘗爲楚州通判其通判楚州者乃劉晏耳

文獻志大書楚州  
通判劉公冕誤也

陸秀夫字君實楚州鹽城人生三歲其父徙家鎮江景定元年傳作寶祐四年史誤登進士第李庭芝鎮淮南辟留幕

中三遷至主管機宜文字庭芝制置淮東擢叅議官

除司農寺丞累擢至宗正少卿兼權起居舍人以禮

部侍郎使軍前請和不就益衛二王走溫州公追從

之立益王于福州是爲端宗進端明殿學士簽書樞

密院事益王殂更與衆立衛王昺爲帝以秀夫爲左

丞相元兵破厓山度不能脫乃伏劍驅妻子入海卽

負帝入海死年四十四

見藝文

繆朝宗淮陰人以環衛官知梅州有意氣常爲常熟邵氏客後從文天祥于平江天祥歸福安朝宗自婺間道以從精練幹實孜孜奉公軍府器械悉出其手空坑之敗自經于山間見文天祥集杜詩序

按文山詩序本作知梅州文獻志及正德隆慶二志皆同自天啟志作知海州于是康熙志及江南通志皆沿其誤字形相近傳寫之過宜從舊本

黃文政淮人戍蜀軍潰間道走靜江馬塹邀與同守城破文政被執大詬不屈元軍斷其舌以次剝剔之文政含胡叱咄比死不絕聲附見宋史劉子薦傳

米立淮人三世爲將從陳奕守黃州奕降立潰圍出江

西制置使黃萬石署立爲帳前都統制元兵畧江西  
立迎戰被執不降行省遣萬石論之曰吾官銜一牙  
牌寫不盡今亦降矣立曰侍郎國家大臣立一小卒  
耳何足道但三世食趙氏祿趙亡何以生爲卒不屈  
遂遇害

張孝忠字正綱楚州人度宗時官管屯千軍大使殉國  
難事詳阮學浩所作傳中見藝文

張德興淮人端宗景炎二年與淮西野人原塞劉源等  
起兵興復司空山民傅高起兵應之遂復黃州壽昌  
戰於樊口殺元將鄭鼎未幾元襲破司空山復陷壽

## 昌德興死之

按潘中丞文獻志云張德興見元昂克兒傳實舒城人考元史無昂克兒傳惟昂吉兒傳載文天祥復起兵海道舒民張德興應之襲破興國德安諸郡還據司空山詔昂吉兒攻之一戰而定殺德興執其三子以獻此中丞所據以馭一統志及新舊府志者故文獻志削德興不載然考宋史瀛國公本紀恭宗景炎二年端宗年號三月文天祥取梅州五月天祥提兵自梅州出江西入會昌縣淮民張德興亦起兵殺太湖縣丞王德答據司空山攻下黃州壽昌軍遇宣慰鄭鼎戰樊口鼎墮木死入月文天祥兵敗於興國乙卯元軍破司空山張德興敗亡宋元二史所載畧同惟淮舒二字各別明一統志及新舊郡志蓋據宋史書之似未可但據元史遂削德興不載也但淮安新舊志通志並作德興宋元二史並作德興似非一人然所載據司空山復黃州壽昌殺鄭鼎等事皆同決非二人興之訛也

明

龔遂榮淮安人讀書好奇計嘗從討福建賊以功授千戶景帝時議迎上皇遂榮投書大學士高較極言禮宜從厚帝怒索書急轂等諱之遂榮自縛詣闈曰臣實爲是書莫感動陛下耳下獄久之得釋居貧授徒後復疏請還政上皇未上而洩復下獄杖幾死繫不行者數年

舊志無遂榮名通志忠烈傳  
有之因取以補舊志之缺

段泰字世亨清河人成化庚子舉人授山東壽光縣知縣忤逆璫劉瑾謫邊衛陞瑞州府通判宸濠反抗節

不從人稱其忠

舊志謫邊衛在陞瑞州通判後按清河縣志謫官  
在知壽光縣時值宸濠之亂在判瑞州時若居邊  
衛不得值濠難也

清河志是當從之

張世顯大河衛人萬歷癸丑武進士落拓有大志不修  
小節始業儒爲同伍所排擠度不能以鉛槧博金紫  
遂發憤以韜鈴顯初授烏龍關守備有威名天啟初  
陞遼東戚家堡游擊適我

清兵渡河提兵出戰單騎貫陣三出三入死鞭下者不  
計其數俄大軍益至他部皆反走家人控馬勒暫避  
之顯不可以刀斫家人手揮使去血戰重圍久之援

兵不至刃及頭顱遂死于陣

趙文英金得勝俱山陽人天啟二年山東白蓮賊數萬攻掠至臨城二人應募隨淮安領兵把總討賊賊困把總於重圍二人奮勇殺賊七人救把總出二人遂爲賊所害碎其屍

王洪亦作宏安東人應募勦白蓮賊至徐州彭家莊探賊被獲拷掠僞至偪使降不從賊乃釘洪于二樹之間洪奮罵不絕口而死

安東志無王洪姓名郡志忠烈既載王洪又有王宏亦安東人按其事實亦係勦白蓮賊亦係釘于二樹間而死明是一人誤分爲二今存前去後庶無重複

張極等二十九人鹽城營兵也白蓮賊徐鴻儒焚夏鎮據戚城漕河梗不通督撫調所屬兵護漕鹽城營以張極等三百八十人往屢與賊戰皆有斬獲賊携老少南下約十萬餘官兵僅千人皆躡賊後獨鹽城兵陳于前作先鋒迎敵奮勇力戰良久賊大至官兵陷賊中左右突不得出擁佛郎機至賊始却而張極等二十九人皆死于陣有父子兄弟同日死王者鹽城立忠勇廟祀之勒二十九人姓名於石副使朱統殷有忠勇廟記載藝文

趙世選字韋所山陽人崇禎中歲貢生選和州訓導到

任甫九日流賊張獻忠逼城下與知州黎宏業學政  
康正諫鄉官馬如蛟等分城固守至三日薄暮暴雨  
忽起城上人不能立賊乘勢登城城遂破遷據城南  
樓罵賊不屈死有司上其狀贈國子學錄賜祭一壇  
潘宏字若稚山陽人崇禎中歲貢生授舞陽縣知縣時  
流寇披猖土賊亦間發宏數討敗之賊首李自成羅  
汝才兵至葉不降屠之舞陽震恐有諸生數十人詣  
宏請稍變通以紓禦宏叱之去賊至發巨礮擊之又  
有小校善射賊賊稍却武生某潛遣人約降開門納  
賊縛宏以獻賊索印不與脅降怒罵不屈乃支解之

子生員澄潤字孟觀巷戰不勝聞父被害亦投井死後督師史可法上其事贈宏按察司僉事

郭九有字無若山陽之廟灣人天啟中恩貢生授衛州府通判值藍山臨武礦寇竊發竭力捍禦轉輪楚豫兩粵間所至有功以憂歸明年粵東猺獞犯順督撫移檄起九有於家趣之入粵與議戰守事宜於是用土攻土以夷制夷身率將士跨江燒崗猺獞悉平授岳州府同知會鬪寇破京師懷宗徇國南遷擁戴福王陞九有爲本府知府乃簡士卒課農桑欲整殘臺以報國及金陵破

大兵南下九有知事不可爲放舟湖中泊岳武穆廟前  
北望泣拜作絕命辭二首從容自縊死九有善書畫  
好吟咏所著有嶽遊從軍諸草瀟湘吟元對諸作行  
世

舊志但云事詳岳州府志其建功端節諸賓蹟皆  
未載考廟碑志有公本傳今刪削繁蕪志其大畧  
此如

張緯字象坤安東人崇禎中歲貢生選銅陵縣訓導甲  
申左良玉稱兵犯闕順流東下抵銅陵緯與令尉諸  
官設法守禦城破不屈死之二僕亦從死

周文煌字存白清河人崇禎中歲貢生授商州州同流

卷之二十一  
三  
寇下會城且及商燁與商洛兵備道嬰城固守援絕力竭城陷被執賊以美官誘之不從更繫燁幼子元生至夾刃脇之又不從且大罵賊斷其舌猶張目噴血喉中作罵聲賊燒鐵納吭中燶其屍元生痛父死哭罵不絕口亦被殺

舊志惟歲貢中有文燁名其出仕死節皆未載今按清河縣志補之

朱日升字君旭號蓼菴山陽人崇禎癸未進士授烏程縣知縣明年國變卽棄官歸隱後以事被逮當事者重其人欲出之日升慷慨自認詣金陵獄弟某往探之擲片紙相示不交一言而退則衣帶贊三十二字

也未幾死於市方其見收也日升才一子不數歲有老僕潛以己子易之去事定始出名玉字少白後爲諸生此僕亦義士也

李幹才字篤生鹽城人崇禎甲申間京師陷北向慟哭焚儒衣冠不食十餘日臨絕時同學者撰文生祭之幹才瞪目長嘆而逝同學有司邦基孫光烈者亦先後慷慨死從鹽城志補

樂大章字君雅鹽城人廩生闡北都之變語家人曰時事至此惟效魯連蹈東海死耳一夕正衣冠出不返徧踪跡之得遺骨於城西大澤中從鹽城志補

王百度字介石鹽城人崇禎中武舉授崇明守備弟百聖字揆一隨兄之官百度家世傳神槍法號梅花槍兄弟並精其藝海寇犯崇明每戰輒兄弟先登一日

百度單騎逐賊被圍數重百聖亦單騎赴救見百度

已中流矢死遂負兄屍潰圍出撫軍命代兄職明年賊渠就撫署蘇撫標弁百聖不勝憤袖鎗鍔自後擊之自縛詣獄當事者重其義烈得不死百聖遂辭歸

躬耕老焉

從鹽城志補

楊正經字懷玉四川酉陽宣慰司人家世爲將正經少有別解通樂律崇禎時以郊廟樂章失次訪求能定

雅樂者宗伯林欲楫薦正經改中書命觀內府五音  
諸譜皆人間未見書間召正經彈琴便歎稱善晉太  
常丞賜名琴出入供奉未幾京城破正經抱所賜琴  
逃難江湖間李子熒爲淮安推官喜琴奕正經來遊  
服僧服爲李上客李爲買宅又爲其子娶婦遂家焉  
年七十餘卒葬城東三里塘黃土橋正經嘗自製琴  
操二二日西方思思君也一日風木思思親也每對  
客揮絃輒淒然淚落識者悲之

國朝

李國佐字芳林山陽北沙人少有勇畧從軍積功加左

都督官武昌游擊康熙戊辰國佐出使荊州夏包子  
殺巡撫據城叛遣卒要於路以好言款之請議大事  
國佐厲聲叱之拔所佩刀立殺數人賊蜂擁與戰衆  
寡不敵將棄馬渡江得一舟無楫櫂不能行復上岸  
坐以刀撥矢受重創不遽死大呼曰何不以鳥槍殺  
我賊從之遂卒有一僕亦及於難從廟灣志補

王之藩字振元清河人順治初恩貢生授通山縣知縣  
值金賊作亂攻通山禦之不克將自殺左右衛止之  
賊繫其母及家人數十口脇之降不屈以見其主帥  
帥獎勵之贈以富貴終不屈與賊反覆抗辨延頸乞

死賊終欲降之繫于別室籜以計脫身出躍馬去賊

營越武寧奉印綬自歸督撫以其狀上聞

從清河縣志補

尚元調字燮臣

一作枚臣

山陽人康熙壬子科舉人選華亭

縣學教諭學術醇正造士有方見學宮頹廢乃歸鬻

其產得三百餘金捐以倡衆卒獲整理學基爲營伍

侵占射圃成牧馬之場鷄塢溷廁偏滿橫舍適奉檄

清理告諸駐防將軍乃將弁交証縱兵侮璣勢陵威

刦侵逼萬狀元調念非死爭不可乃作遺書叙述顚

末置諸懷袖以屬其子言不及他遂自縊於射圃堂

顏如生郡邑震動巡撫御史具實入告自將軍以下

各論如律驅逐餘兇盡返侵地華亭士庶咸爲感泣  
後祀名宦

丁士琦字覺菴山陽人康熙初官廣東南康巡檢弟士珍字子嘉隨兄之任甲寅值海賊倡亂士琦心懷不屈間關從王賊怒欲屠其家囚士珍于獄欲官之士珍寧死不辱及賊遁兄弟復相聚當事者以士琦忠義廉幹委知饒陽縣事未百日卽辭官歸

淮安府志卷之二十二

仕蹟

書稱三載考績又曰庶績咸熙績之爲言非徒簿書期會循分稱職而已也淮郡魏稱陳元龍父子吳稱步氏蓋自三國以迄南北朝土宇分裂其時爲吏者皆以捍禦牧圉屏藩王室爲事故當日之仕蹟異於承平也唐宋混一始有意乎牧民之政矣然自唐裂爲藩鎮宋與金分界淮流則世未平而仕績又因之以異沿及元明天下一統承流宣化代不乏人而人才之多或不逮于古泊乎我

朝受命而賢士大夫後先相望出入均勞小大宣力確  
有可紀者至六十有八人噫何其多也國將昌賢才  
出其斯之謂歟因并論其世次其人俾後之居官者  
得以考焉志仕蹟

漢

陳球字伯真下邳淮浦人也父亹廣漢太守球少涉儒  
學善律令陽嘉中舉孝廉遷繁陽令復拜侍御史時  
桂陽賊陸梁大尉楊秉表球爲零陵太守球到設方  
畧期月間賊虜潰散而州兵朱蓋等復反與桂陽賊  
轉攻零陵零陵下濕城不可守掾史白遣家避難球

怒斥之乃弦大木爲弓羽矛爲矢引機發之多所殺傷賊復激流灌城球輒因地勢反決水淹賊相拒十餘日不能下會中郎將度尚將救兵至與尚共破斬蓋遷魏郡太守徵拜將作大匠遷南陽太守以糾舉豪右爲勢家所謗詣廷尉抵罪會赦歸家復徵拜廷尉熹平元年竇太后崩中常侍欲別葬太后而以馮貴人配祔詔公卿大會朝堂令中常侍趙忠監議公卿以下各相顧望球曰皇太后母儀天下宜配先帝忠笑曰陳廷尉宜便據筆球卽下議公卿以下皆從球議六年遷司空後誅宦官謀洩下獄死時年六十

二子瑀舉孝廉累遷吳郡太守不之官從子珪珪子登並見下

陳珪字漢瑜舉孝廉劇令去官舉茂才時袁術僭亂欲結呂布爲援爲子索布女爲婦布許之珪恐術布成婚則徐揚合從將爲國難于是往說布使絕術婚會操使至拜布爲左將軍布大喜卽令珪子登詣操奉章謝恩登見操陳布勇而無謀輕于去就宜早圖之操說卽增珪中二千石拜登廣陵太守臨別執登手曰東方之事便以相付袁術怒布遣大將張勲喬蕤等與韓暹楊奉連勢攻布布懼不敢謂珪曰今致術

軍鄉之由也爲之奈何珪曰暹奉與術卒合之師謀無素定不能相維子登策之比於連雞勢不俱栖立可離也布用珪策遺暹奉書約同力破術悉以軍資與之遂共擊勦等大破術衆

陳登字元龍舉孝廉除東陽長州牧陶謙表登爲典農校尉後與父珪俱事呂布珪知布不足以共事乃遣登爲布奉使到許曹操用爲廣陵太守使圖呂布登在廣陵明審賞罰威信宣布海賊萬有餘戶束手歸命未及期年功化已就曹操至下邳登率郡兵爲先驅布旣伏誅登以功拜伏波將軍孫策遣軍攻登於

匡琦城群下咸以賊衆十倍當引軍避之登不從乃閉門示弱將士銜枚寂若無人昧爽開南門手執軍鼓縱兵乘之敵衆大破登乘勝追奔斬虜萬計策忿喪軍更大興兵向登登復敗之還東城太守廣陵吏民援郡隨登登旣去孫權遂跨有江外曹操每臨江而嘆曰恨不用陳元龍計而今封豕養其爪牙乎初許汜與劉備並在劉表坐上共論天下人汜曰陳元龍湖海之士豪氣未除備問汜曰君言豪寧有事耶汜曰昔過下邳元龍無主客意久不與相語自上大床臥使客臥下床備曰君有國士之名不知憂國忘

家而求田問舍言無可采是元龍所諱也何緣當與君語如小人欲卧百尺樓上卧君於地何但上下牀之間邪表大笑魏文帝世追羨登功拜登子肅爲郎中

臧顥廣陵射陽人也初除盧奴令冀州舉尤異嘉平間拜揚州刺史平會稽妖賊許昭是時邊方有警羌胡出寇三府舉能遷顥爲使匈奴中郎將討賊有功徵拜議郎還京師見太尉袁逢逢問西域本三十六國後分爲五十五稍散爲百餘國其國大小道里遠近人數多少風俗人物種數顥具言西域本三十六國後分爲五十

俗燥濕山川草木鳥獸異物名種不與中國同者悉  
口陳其狀手畫地形逢奇其才轉拜長水校尉終太

原太守子洪

見忠烈傳

吳

步驥字子山臨淮淮陰人世亂避難江東種瓜自給晝  
勤四體夜誦經傳孫權召爲主計除海鹽長還辟車  
騎將軍東曹掾出領鄱陽太守徙交州刺史明年拜  
使持節征南中郎將斬蒼梧太守吳巨撫益州大姓  
雍閭加拜平戎將軍封廣信侯蠻夷騷動皆討平之  
遷右將軍左護軍改封臨湘侯旋領冀州牧都督西

陵代陸遜撫一境前後薦達屈滯救解患難書數十  
上多蒙采納後代陸遜爲丞相猶誨育門生手不釋  
書被服居處有如儒生在西陵二十年鄰敵敬信內  
外肅然卒子協嗣統鷗所領加撫軍將軍協卒子璣  
嗣

步闢協弟也繼爲西陵督加昭武將軍封西亭侯鳳皇  
元年名爲繞帳督闢累世在西陵卒被徵命自以失  
職又懼有讒禍於是據城降晉遣璣與璡詣洛陽晉  
以闢爲都督西陵諸將事衛將軍儀同三司加侍中  
假節領交州牧封宜都公璣監江陵諸將事左將軍

加散騎常侍領廬陵太守封江陵侯璿給事中宣威

將軍封都鄉侯命羊祐楊肇往赴救闢孫皓使陸抗

西行祐等退遁抗陷城斬闢等步氏泯滅惟璿紹祀

按三國志註引吳書曰晉有大夫楊食采于步後  
有步叔與七十子師事仲尼秦漢之際有爲將軍

者以功封淮陰侯臨其後也淮陰之有步氏其由

來遠矣然將軍者其名無可考行事亦泯滅失傳  
故舊志不載而但載丞相隱然丞相子協及闢孫

璣及璗皆載在史冊但背吳降晉臣節有虧耳舊  
志未及今按三國

志鷗本傳補之

唐

王義方泗州連水人少孤且寢事母甚謹淹貫經術高  
自標樹舉明經詣京師有客徒步疲於道者言將省

父遠方病困不能前義方解所乘馬遺之不問姓名而去由是譽振一時太宗使宰相聽其論是時尚書員外郎獨孤慤方以儒顯給事中許敬宗推慤確論義方引逮百家出慤之上左右爲慤不平輒罷會後補晉王府叅軍直宏文館顯慶元年擢侍御史會李義府不法時人無敢白其姦義方決意劾奏入告其母母曰昔王母伏劍成陵之誼汝能盡忠吾雖死不恨義方卽上言具法冠對仗三叱義府下跪讀所言

疏見藝文

帝方祖義府貶義方萊州司戶叅軍遂聚徒教授母亡隱居不出年五十五以疾卒宋崇寧間追贈

御史

宋

魚崇諒字仲益其先楚州山陽人徙於陝幼能屬文歷仕唐晉契丹漢至周皆爲翰林學士知制誥後漢時除保義軍節度副使領台州刺史會舉師討三叛凡軍儲調發皆促期而辦近鎮賴之未幾召爲學士周祖踐祚書詔繁委皆崇諒爲之加工部侍郎以母老求解官詔給長告俄拜禮部侍郎詔令侍母歸閼崇諒再表以母老病乞終養太宗卽位詔授兵部侍郎致仕

劉承規字大方楚州山陽人太宗卽位超拜北作坊使  
泉州土民嘯聚爲寇承規率兵討平之太平興國四  
年率師屯定州以備契丹真宗立以承規領勝州刺  
史咸平三年議修天雄軍城壘命承規乘傳經晝上  
詢承規西事請益環州木波鎮戍兵以爲諸路之援  
自朝陵東封皆留掌大內禮成當進秩表求休致手  
詔敦勉上作七言詩賜之本名承珪以久疾羸瘵上  
爲取道家易名度厄之義改珪爲規疾甚致仕卒謚  
忠肅子從愿爲西染院使

王資深字取道山陽人省試第二中元祐二年進士除

尚書郎上命權御史決獄多所全活遂入臺爲御史  
恩振風憲首論一二大臣醜狀草具將上蔡京使謂  
曰謹勿言當以此位相處公不答時有張懷素者來  
謁授公道術書一緘公不啟封旣而詔捕懷素繫獄  
一時朝士坐其事多罹極刑公獨事狀明白追秩安  
置新州宣和中第四子洋中甲第上閩卷見公名曰  
資深有子可嘉命復原官公以美髯上常目爲美髯  
翁徵猷新建上令執政選名士十人以進覽奏不  
見公名問美髯翁何不與執政不得已置公名紙尾  
上首以公充待制靖康中金人犯闕公久以病歸楚

有密旨以蠟丸名公欲以爲樞密院使路梗不通公  
嘗著周書述周興至於戰國又著方言數十卷見嘉  
定山陽志子洋

王洋字元渤亦以省試第二人中宣和六年甲科紹興  
初以右贊善命直徽宣閣歷典三郡所至有異效晚  
守鄱陽洪忠宣公皓使虜歸忤檜意人無敢過其居  
公獨修舍坐免去有東牟集三十卷行世周益公爲  
之序

元

趙蕡翁字維清宋丞相趙忠簡公六世孫本絳州聞喜

人朱末子孫遷淮遂爲山陽人元延祐乙卯始設科取士賀翁首膺鄉貢第二名會試第五名廷試賜同進士出身授泗州判官賀翁每念故祖忠簡公謫於潮秦檜使人逼殺之潮人立祠祀焉乃願入廣訪求遺祠朝廷可其請授潮州路推官後爲中大夫補製雅樂卒於杭有覆瓿集行世

韓渙字叔亨元初自開封徙淮遂爲山陽人才資警拔登延祐乙卯進士初授御史歷陞刑部尙書嘗奉命轄浙藩督海漕經國濟邊中外倚毘稱爲社稷臣遷四川行省左丞卒贈高陽郡公子一早卒孫肅寬

正德志本載公爲延祐乙卯進士康熙志選舉卷  
亦同至仕績傳乃從文獻志改稱丙辰進士按元  
史選舉志延祐二年始廷試進士五年又廷試進  
士延祐元年爲甲寅二年正屬乙卯若丙辰則屬  
三年不逢廷試進士之歲文獻志不知何據康熙  
志仕績傳蓋襲其誤也今改正前趙蕡翁傳稱

元延祐甲寅始設科取士  
亦誤當依元史作乙卯

陳玘龍鹽城人由人材任崇明州同知建太學創義倉  
除冠賊去姦宄民有寃獄平反之以金報謝却不受  
人稱其廉

舊志不載玘龍隆慶志始有天啟次于張素願達  
之後疑爲明成化間人及考鹽城縣志則元人也  
緣本傳未註何年出仕  
故顛倒失次如此今正

金原舉鹽城人美儀容善吟咏博通經史尤工楷書篆

草弱冠爲郡學錄後參贊總兵擴廓平山東陞吏部掌銓科駁歷州郡元末歸鄉後薦授江西南康令終於家所著有雲谷集

明

羅拱安東人洪武甲子舉人歷兵科給事陞河南布政司右叅議駁歷內外咸有成績

劉勉安東人洪武甲子舉人初授典史擢山西道監察御史調廣東道風力峻整一時有關節不到閭羅包老之稱後任中軍都督府經歷陞廣東左叅政致仕

從安東  
志增入

楊靖字仲寧山陽人洪武十八年乙丑進士歷官戶部侍郎時任諸司者率進士及太學生時有不法者帝製大誥舉靖以風厲之曰此亦進士太學生也能率職以稱朕心其見稱如此進秩尚書尋改刑部靖承旨研辨多所平反帝嘉納之已坐事免會征龍州趙宗壽詔靖諭安南輸粟餉師以白衣往宣示反覆乃輸粟二萬至滄海江別造浮橋以達龍州帝大悅拜靖左都御史靖公忠有智畧善理煩劇寵遇最厚以事賜盡於家時年三十八嘉靖中郡人都御史潘埙建昭邱院祀之並祀鄉賢

李徵山陽人洪武中由國子生任考工監令有幹濟才

陞兵部尚書卒祀鄉賢

舊志載徵入徵辟通志因之按文義洪武中三字當移在園子生上又大徵康熙二志徵辟內作兵部仕績傳內作工部考正德隆慶二志工字誤今正

韓寬漢之孫元季隱居不仕明洪武初以才行被選授戶部員外郎累陞戶部侍郎先是祖左丞公拜命入蜀肅以長孫侍行寬奉祖母太夫人留江南者十七年及寬入官於明時太夫人壽踰八十定省日踈每俸入及朝廷頒賜輒走使持獻爲太夫人壽仍作奉橘圖以繫孝思一時名公卿皆咏歌之傳爲盛事見

韓氏家乘

歷代郡志皆但載韓漢不及其子若孫子某孫肅本無事實可考缺而不錄可也孫寬官至侍郎復有才行豈可使湮沒失傳今據文獻志補入

李文字方平鹽城人洪武初以儒士薦充本學訓導一日修廢井得白金數十兩拒弗納乃買經史貯學庫以遺後學陞江西樂安縣知縣有易辯擬讀書記四書直解藏於家卒入鄉賢

張士彬山陽人洪武中以才行卓異薦授江寧知縣尋遷江西道監察御史直聲振一時特陞河南按察司在任以振揚風紀爲已任

朱昇字原明鹽城人生而穎悟博綜典籍不求聞達洪武中舉通經儒士授後軍都督府斷事帝覩蘊武牧羊圓命萃臣賦詩獨昇詩稱旨擢翰林修撰兼修國史日置左右備顧問以老乞歸朝野榮之

成均鹽城人永樂初由舉人入國子監用薦授監察御史外遷江西按察司副使宣德初命署南京刑部侍郎巡撫浙江築鹽官瀕海石隄二千四百餘丈以捍潮患浙民賴之歷任三十餘年所在有治績正統中卒於官

賈進字勤道安東人永樂甲午科舉人官義烏敎諭改

聞喜以薦授陝西道監察御史巡按雲南平南蠻刀  
癉之亂雪趙處同冤還朝日凡贈遺一無所受又巡  
按南直隸及陝西劾罷軟官吏雪冤捕蝗招撫洮州  
生番陞貴州按察司僉事調湖廣以老乞休歸家壁  
立所著有樂道子詩集卒祀鄉賢

丁珏山陽人居淮北鎮授徒鄉校有澄清天下之志文  
廟渡淮獻十二策宣廟時以人材徵授監察御史奉  
命抄廣右豪族珏潛往廉其實一舉撲滅之奸臣紀  
綱竊權亂政珏率諸御史廷劾之紀綱伏誅改給事  
中以言事謫戍雲南

王衍字伯蕃清河人以楷書入監爲人有威嚴行已接物豪爽不苟撓監察御史永樂間交趾不附帝命征之選臺臣可寄節鉞者加衍都察院交趾道御史衍至諭以禍福交人感泣納貢如初卒祀鄉賢

王圭字宗錫清河人武昌守德芳之子以廩生仕都察院司務清慎盡職陞工部都水司員外郎致仕修飭河防民受其賜又捐資重修廟學士林稱之

金濂字宗翰明史作宗浦其先北平人洪武初曾祖誠始遷山陽濂登永樂戊戌進士拜監察御史有能聲宣德初巡按廣東改按江西浙江捕巨盜不獲坐免盜戮

乃復官用薦遷陝西副使正統初擢僉都御史叅贊  
寧夏軍務濬三淤渠溉蕪田一千三百餘頃加右副  
都御史尋拜刑部尚書侍經筵福建賊鄧茂七作亂  
征之不克命寧陽侯陳懋爲將軍往討以濂叅軍務  
濂至御史丁瑄已大破賊茂七死餘賊擁其兒子伯  
孫據九龍山作亂勢益熾濂與衆謀羸師以誘其出  
伏精兵入其壘遂擒伯孫帝乃留濂討餘賊之未下  
者景帝召還加太子賓客尋改戶部尚書爲御史所  
劾下都察院獄三日釋之改工部吏部尚書何文淵  
言理財非濂不可乃復還戶部上疏乞骸骨帝慰留

之卒於官以軍功封沐陽伯謚榮襄

舊志所載詳畧不類今據新修  
明史本傳節刪之庶爲得實

羅銓山陽人永樂辛丑進士宣德中授監察御史以才能稱陞湖廣按察使克振風紀未幾卒於官

按銓乃永樂辛丑進士自隆慶志以下仕績傳並稱爲宣德間進士考正德志本云宣德中由進士拜監察御史蓋言拜官之日在宣德  
中也後人刪去中字遂誤今改正

湯子厚清河人洪武中以懷才抱德徵授陽朔縣知縣端方清慎人愛畏之修公廨掘地得金役人以獻叱去不顧當道以廉能嘉異之卒祀鄉賢

夏昇字景高鹽城人洪武間以人材舉授衛州府開化

縣知縣歷任衢州知府祐姦弊清丁糧定等則均賦役民咸戴之前守姓曾後守姓簡民爲之謠曰曾也增不上簡也減不下若要知民情除非是老夏洪熙中調萊州府知府治萊一如治衢

王德芳清河人洪武初以賢良方正徵授武昌知府愛民守法一郡以治宜廟時課最入覲極言軍民利弊帝爲嘉納特錫宸翰以寵異之卒於官

沈翼字克敬山陽人宣德丙戌進士正統初擢南京刑部主事改戶部翼長于計畫凡所部倉廩之盈虛戶口之登耗山川之險易賦稅之多寡無不周知時征

雲南土官任思發以翼爲轉輸使值連歲荒歉糧餉匱乏翼區處有方供饋弗絕沙州南哥內附勅翼徙置東昌平山等處撫綏得所勘廬州民田奏減額外稅五萬石陞郎中邊寇犯順欲據通州積粟勅翼往焚之翼乃僞焚腐草烟燄蔽天寇遁去上嘉其應變超拜本部侍郎陞南京戶部尚書天順初致仕卒祀

鄉賢

劉安字志康少從祖母姓乃姓高其先泗州人祖遷山陽因家焉少喪父母旣長質貌魁偉舉止端重入郡庠以貢入太學擢知南宮縣值境內蝗旱率吏民禱

三日乃雨蝗亦頓絕明年鄰邑復蝗獨不入境歲又  
大稔民歌曰侯宰南宮民和政通蝗不入境今之魯  
恭時有白蓮賊騷動河北安捕其黨得簿書錄妖者  
姓名亟火之全活幾萬人邑南有李冰祠碑高丈餘  
歲久祠頽碑已仆安因祈雨至祠下見碑石甚巨非  
數百人不能起告于神曰神如有靈碑自立安當新  
其祠翌日雷雨大作四野霑足碑亦起立因具其事  
上聞且請新其祠詔許之召工蘿草萊掘地得錢六  
十萬緡遂爲修葺之費尋被薦陞杭州知府又陞浙  
江布政司右叅政病卒年六十二

按正德志作刺史李冰祠隆慶志作季冰祠天啟  
康熙二志及文獻志皆作李陽冰祠五書所見互  
異南宮屬真定府考唐書李陽冰本傳陽冰未嘗  
爲真定刺史又按白尚書圭所撰劉公行狀亦但  
稱李冰祠與正德

舊志同今從之

史敏字德敏宋大師越國公之裔祖谷平遷於淮爲山  
陽人正統乙丑進士除刑部主事陞員外郎以薦陞  
河南布政司右叅議陞辭之日召入文華殿密諭賜  
酒給鈔旣之任撫流移鋤冠盜三載奏最賜誥命進  
階朝議大夫九年考績陞右叅議敏以母壽百有一  
歲疏乞歸養卒于家敏生平于書無所不讀詩文詞  
曲各臻其妙篆隸真草咸有古意所著有松泉集傳

世

齊昭字雲漢山陽人正統中由監生授長清訓導以學行聞擢監察御史陞山東提學僉事敷敎有方士習不變後致仕進階副使年八十五卒

李瓊字思獻山陽人由翰林庶吉士任吏科給事中封駁彈劾不避權貴時負剛直之稱陞浙江右布政致仕卒于家

史瓘字德輝山陽人以進士授監察御史累陳時政多見採行陞浙江按察司副使持憲有體後致仕卒於

家

葉淇字本清曾祖容以詩名有樵雲獨唱傳於世祖士廉洪武初戍淮遂爲淮安衛人景泰甲戌進士拜監察御史順天初坐同姓名累黜知武陟縣改清江寶坻皆有惠政成化初以薦超陞廣西按察司僉事撫定南丹土職督捕南寧荔浦諸賊改山東遷陝西副使領岷州兵備又撫定松潘賊勦洮州賊擢河南按察使拜都察院左僉都御史巡撫山西值歲屢歉發廩賑粟全活者衆奏免各州縣秋糧九十五萬三千石草一百九十九萬六千束俱從之調大同兼贊理軍務宏治初召爲戶部右侍郎轉左進尚書加太子少

保有姦民獻大名地爲皇莊洪議歸之有司內官龍  
授請開銀礦淇不可哈密爲土魯番所陷守臣請暫  
給廩食處之內地洪曰是自貽患也寢其奏洪居戶  
部直亮有軌能爲國家惜財用每廷議用兵輒持不  
可以疾乞歸卒贈太子太保

按明史及文獻志增  
減較舊志稍異

蘇慶字福遠安東人景泰庚午舉人授江西道監察御  
史改廣西道御史給賞官軍盡釐宿弊巡按江西清  
戎籍豪右莫敢規避又按廣西黜陟惟允明年入朝  
以眩疾作憇行御道出知利津縣捐俸賑荒存活甚  
衆調淄川疾復作遂乞歸

潘亨字從禮山陽人景泰丙子舉人授順慶府同知時  
御史有清理戎政者移檄所屬清出軍官數溢者受  
上賞不及者罰一時多附會平民爲軍獨順慶數不  
及額御史初甚銜之及覈實深服其公改武昌操持  
益謹致仕卒於家亨生平儉約不尚浮靡以古之清  
苦者自擬性喜吟咏所著有冰鑒老人集祀鄉賢

皇甫貴字可尊安東人景泰中歲貢生博學工詩多驚  
人語在太學八年適省直缺邑宰命兩雍升士授天  
台縣知縣豪邁挺屹不避權勢政平訟簡以廉能名

沈維與資同作  
瑤者誤字廷實山陽人戶部尚書翼子也天順

丁丑進士歷陞吏科都給事中冊封藩王饋遺不受  
在諫垣十餘年多所建白舊制四品以上官由吏部  
推陞忽御批四品以上官俱由內選旌慮中官擅權  
上疏極論言甚剝切竟得俞允權貴忌之出爲太僕  
寺少卿未幾卒於官祀鄉賢

葉蕡字崇禮山陽人尚書淇從子天順甲申進士歷刑  
部主事員外郎知嘉興府再知台州當官內和外嚴  
人不敢予以私成化中歲饑屬邑多盜官兵莫敢擾  
蕡肩輿往諭賑貸有差賊遂解散丁內艱再知廣信  
累陞江西布政司叅政左右布政平瑞州盜鄧達入

等有功陞都察院右副都御史總督南京糧儲進工

刑二部侍郎致仕卒祀鄉賢

按正德天啟二志及文獻志皆稱贊爲天順甲申進士<sub>（薩慶康熙二志及江南通志則稱爲庚辰進士）</sub>天啟志人物表亦載爲庚辰科前後互相矛盾據葉氏家傳以甲申爲是甲申不逢會試之期考明史選舉志天順七年癸未試日場屋火改期八月會試明年甲申三月始行廷試故是科進士不稱癸未而稱甲申也

陳讓字德光大河衛人由進士令寶坻民俗健訟讓聽斷明決卒擒首惡置之法遷宛平權貴請托不行擢知杭州府境內大治值海勢內徙偏海寧城讓請去城里許開支河築內隄延袤十里不與海爭利海果

至隄而止海寧人至今尸祝之有勢家持上官短長  
占孤山三賢堂並祀田民田讓力奪給主遂誣奏讓  
勘官冀厚賂公不可竟落職後遇赦復官年六十八

卒祀名宦

許鵬字雲程山陽人成化乙酉舉人任四川邛州知州  
轉山西蒲州皆有惠政累加旌異陞袁州府同知致  
仕進階四品卒

張素字立卿其先吳人父景儀嗜詩工楷篆僑居京師  
三楊學士欲薦授中書辭不就挈家南徙寓居清江  
浦遂占籍山陽素資性明敏博通五經尤長於書旁

徹陰陽醫卜之說中成化乙酉舉人五上春官不第授河陰知縣適歲大祲簡訟獄罷追呼節厨傳停榷稅平市價與民休息民賴以安歲餘大治歸卧林下三十年踪跡未嘗入城府所著有檜泉集叙姓千文和續咏史詩咏物詩各如干卷卒年八十九子雍正德中以經明行修徵不就鄉人賢之稱曰淮川先生卒年八十一俱祀鄉賢

楊理字貫之山陽人孝子顥之子成化丙戌進士歷官刑科都給事中叅駁詳允凡所舉奏不務急刻充宣寧王府冊封副使不受餽賚同考禮部時稱得人歷

陞大理寺左丞詳讞平恕勘陽曲王府獄事悉解寬  
濫巡撫河南歲饑河大決汴城幾墊乃增築汴堤水  
不爲害湖廣饑民流入盧氏永寧將構亂躬往撫諭  
發銀穀賑之有司請俟奏報日事在不測俟奏報民  
死且盡去爲盜如以爲罪某當之比勅至悉如所議  
全活不可勝紀陞工部右侍郎在部愈勤慎平生好  
汲引後進卒年六十遣官諭祭墓

石渠字翰卿清河人卜居淮之清江浦成化丙戌進士  
授刑部主事歷陞山東按察使僉事分巡遼海東寧  
道在遼數年按究官吏撫恤軍民邊境以寧陞本司

按察使審覈重囚日有平反察舉廉貪憲體貞肅會將朝覲當事欲齎訖之遂拂衣歸卒祀鄉賢

張和字宗禮山陽人游太學嘗資同業之貧乏者後其人補縣有所饋遺不受且勗之曰可善自持此非所望成化己丑成進士試政工部差保定抽分時宦官世據閼隘常盛筵厚餽以唱分司墮其計者輒爲阻撓和至盡釐其弊宦官領叢市木以償官時以剛方稱之陞御史卒于官

趙汸字汝遠其先河南衛輝人吳元年來淮遂爲山陽人成化辛卯舉人壬辰會試中乙榜授順天府儒學

訓導諸生饋遺一無所受歷典山東江西文銜所得皆一時名士陞山東長山知縣益堅清操累以卓異旌陞南京刑部主事進員外郎在部九年人稱爲趙清天陞雲南右叅議分守官舊有年例錢法白巡按御史革其弊以疾乞歸杜門養靜家徒壁立時論多之卒祀鄉賢

汪成安東人成化甲午舉人官淮府長史祀鄉賢

按舊志汪成傳但載淮府長史一語並不著其行事若何考安東志亦復全無事實倒不應入傳但安東已崇祀鄉賢必非混泯無傳者歲月久遠典籍散亡姑仍舊志書之以俟詳考

尹珍大河衛人成化乙未進士授工部主事出監徐州

洪盤詰漕舟雖淮大兩衛官軍無一毫私貸建官署  
廠局五百餘間種柳鑿井以便行人事竣改刑部主  
事陞員外郎出爲太原知府珍性剛不欲少挫于人  
到官爲按察使某所誣奏被逮事白復任以病卒妻  
子貧甚不能爲生卒祀鄉賢子京

韋斌字彥質大河衛人成化戊戌進士授戶科給事中  
封駁論奏不懈于位同考禮闈有欲取當軸子孫以  
獻媚者斌力持不可當軸者銜之出爲廣東提學僉  
事政聲徹京師陞福建副使仍督學政二藩人文藪  
澤斌校閱精審經其品目多爲聞人嘗曰糊名命題

我則試人填名揭案人則試我矣庸可高下其手耶  
投劾歸卒祀鄉賢

顧達字存道先世居崇明之西沙曾祖從戎隸大河衛  
遂家焉十歲通韻學精算數弱冠爲府學生提學御  
史戴珊方以識操取士甚器重之中成化戊戌進士  
授宜陽縣知縣宜有銀礦洞在萬山中有孫叅政者  
懼貽民患封之又請於朝設官以守後爲都御史承  
中官意有異議達曰公爲叅政則封之爲都憲則開  
之何也力爭得寢歷任陝西行太僕寺少卿所督榆  
林西寧洮岷諸處番夷出沒不常考牧必親歷其地

持心公恕事外不擾沿邊諸節鎮皆嘆息以爲不可  
及以病乞歸正德中同修郡志卒祀鄉賢

王益謙字體乾成化甲辰進士授刑部雲南司主事歷  
陞刑部廣西司郎中卒於官謙屢任刑曹按擬大獄  
明決立剖案無留牘

嵇鋼字克堅安東人成化丙午舉人授海鹽縣知縣陞  
河州知州時劉瑾專恣以河州產金來索鋼不與愛  
民好士興學校鋤強梗尤多善政卒祀鄉賢

胡璉字器重其先沐陽人世居山陽宏治乙丑科進士  
以南京刑部郎中出爲閩廣二藩兵憲勦賊以不殺

爲功多所全活島寇佛郎機牙肆刦海上公選鋒猝入奪其火器其器猛烈夷人所恃得之遂爲中國利因名爲佛郎機中國有佛郎機自此始遷藩臬長晉中丞巡撫遍歷兩京戶部侍郎致仕家居遇征安南薦起督餉卒年七十三所著有南津詩集璉天性孝友湛深經術里居教授門徒甚盛如鄒東郭守益程松谿文德皆受業弟子也子效才效忠效謨效詮孫應恩應徵應嘉曾孫一炳皆有名

胡效才字汝愚侍郎璉子嘉靖丁丑進士授東陽縣知縣以清惠著聞擢監察御史時諫官史道閭閻以言

事被謫比至德州復逮下詔獄效才抗章論救遂得免又因宦官用事疏言孝憲兩朝德澤近來斲喪已盡陛下何恃以無恐急宜親近儒臣以隆治本時傳誦之忌者乃以舊例父位大臣子弟不宜在言路遂改行人司司正未幾出守大名尋調真定凡謁臺察銓司長揖而已雖以秉正不阿稱竟緣是不得久于其位歸閑西園終老其中

胡應嘉字侍郎璉孫嘉靖丙辰進士授宜春縣知縣擢吏科給事中條上四事一日端士習二日敦節儉三日公選法四日慎薦舉言頗激切明年劾文選

郎中周良寅提學御史某貪黷罷之又上言國家選用臺諫唯採虛聲罔稽實行郡推縣尹得列薦剡者輒詬詬以臺諫自負若近時知縣熊秉元之卑鄙潘良貴之踈放劉介齡之貪濁皆得與選衆論噴噴乃更置部寺部寺豈處不肖地耶尤切中時弊遷吏科都給事又劾奏大學士高拱及吏部尙書楊博拱銜之將斥應嘉爲民言路大譁乃調出爲建寧府推官歷陞湖廣布政司叅議以憂歸卒

舊志不載應嘉張太史新纂山陽縣志人物志亦無之惟叢志末卷載之甚詳豈以其有構陷沈祭酒事故見揅于鄉里耶然明史有應嘉傳載其居諫職號敢言所載諸攻訐事與張志畧異皆不可

廢也因采綴成傳  
以補前志之缺

藍郁字國馨鹽城人宏治壬戌進士授祁陽知縣調嘉  
善皆有惠政以考最陞大理寺評事多所平反致仕  
歸值歲荒鄉里逋賦無出捐三千餘金以蘇衆因合  
邑德之

潘墳字伯和山陽人正德戊辰進士授工科給事改吏  
科性剛決彈劾無所避乾清宮災上疏諭時政言甚  
剴切三遷至兵科都給事中忤錢寧調外任歷陞河  
南巡撫潞州賊陳卿據青陽山爲亂墳乃謀合諸路  
兵夾攻分五哨三路入募土人爲導官軍奮擊大破

之降二千三百餘人自進兵至搜城賊巢凡二十九日捷聞帝將大賚桂萼惡之但給銀繁而已會以事罷官年八十七卒祀鄉賢

楊谷字遷喬山陽人正德戊辰進士授松陽知縣政大修舉江西大盜流刦及浙谷區畫城守身先士卒不旬日而定擢監察御史屢有條陳語多激切以母老乞歸

尹京字兆之大河衛人正德辛未進士授工部主事監寢陽七十二泉以清謹稱改刑部陞員外郎時權姦執政一無所撓陞山西僉事密擒妖賊之首惡餘黨

淮安府志 卷之二十一  
解散又孟城礦賊大閔使土人諭以利害遂平陞浙江按察使副使有奸人以妖術惑衆勦之止罪首魁餘釋不問每臨大事善斷類此以暴疾卒於官

萬雲鵬鹽城人正德甲辰進士授南京吏部主事出爲湖州知府勤恤民隱頗著能聲陞襄陽道遷浙江按察使擢福建右布政使矯厲風節清介自持士大夫推重祀鄉賢

佟應龍山陽人正德辛巳進士授新昌知縣有治績邑人禮部尚書滿公晟兵部尚書呂公光洵時皆爲諸生應龍卽以公輔期之人服其鑒歷陞工部郎中出

理河道時河決張秋應龍探思詳畫不日就塞運道  
賴焉出守鳳翔得士民心如新昌竟以忤權貴抗疏  
歸

盧蕙字子貞山陽人嘉靖癸未進士授刑部主事以祖  
母年高陳情改南京戶部調兵部時大同兵變職方  
屢不稱以大司馬特薦蕙居是職蕙至邊懲債帥絕  
請謁易置將吏調度諸邊事得宜擬陞銓曹會與當  
事不合出爲廣東布政司右參議陞浙江按察司副  
使布政司叅政本省按察司晉廣東江西左右布政  
司故事外僚內陟但下一階時又以事爲分宜所銜

乃下三階拜僉都御史巡撫薊遼至鎮整飭戎務東  
徵以寧時奉勅燒荒塞外早寒雪叢聚至裨將以所  
衣貂裘進却不顧曰一軍皆寒吾何忍獨御遂中寒  
疾回鎮至廣寧卒

劉袞字思補鹽城人嘉靖戊子舉人授新喻知縣邑中  
賦多不均袞爲作均賦書邑無城池時流寇竄賊狎  
至羽書旁午袞畫江而守賊不敢犯喻壤接袁州分  
宜爲嚴相嵩里遠近皆趨附嵩袞獨憇直無所餽獻  
會南郡兵譁狀主帥大司寇委咎糧遲免郡吏嵩令  
窟入袞名遂落職改授紹興府學教授典甲子廣西

鄉試致仕歸卒年八十

馮煥字養晦山陽人嘉靖戊戌進士授刑部主事典十三省章奏有勲臣某以罪下詔獄分宜屬勿深治煥嵩門生也執法不阿忤嵩意以中旨詔逮幾不免乃作四懷詩自遣後嵩敗詔起茂名尉典粵鄉試號得人陞德清令斷疑獄置蔡某之妾于法人頌神明未幾罷歸所著有南淮近集

沈坤字伯生大河衛人嘉靖辛丑第一人及第歷官南京國子監祭酒在翰林二十年天性梗直任氣違俗居母喪時倭賊犯淮坤散家資募鄉兵千餘人自教

練之倭縱火延燒官兵且却坤率所部親當矢石射  
中其首乘勝追殺城上人望之呼曰狀元兵未幾倭  
復以二十二船從泗而下焚殺尤慘坤與戰又大破  
之巡撫李燧薦其功起爲北祭酒爲給事某所構陷  
巡按御史林潤劾之遂被逮未幾卒於獄

金滋號耻菴山陽人嘉靖癸卯順天舉人授贊皇縣知  
縣山邑苦旱虔禱得雨流民歸農歲以不祲興學校  
均協濟平反疑獄尤多善政陞湖州府同知時倭寇  
侵擾防守謹嚴民賴以安

倪潤字伯兩大河衛人嘉靖甲辰進士授南城縣知縣

廉靜自守當觀考天下第一擢南京工部虞衡司主事  
益勵清節監龍江及蕪湖抽稅毫釐不私有中貴  
恣肆力遏之罷監守之貪婪者直聲動一時轉都水  
員外以憂卒潤篤好性命之學所輯有雲門錄藏于家

宋敬字東川鹽城人嘉靖丙午舉人授蒙陰縣知縣以廉惠爲治邑人作歌美之以忤朝貴乞歸孫曹

按郡志及鹽城縣志皆無敬傳新纂江南通志有之今據此增入

朱笈字懋學桃源人嘉靖丁未進士授南京戶部主事  
嘗彈齊庶人不報楊繼盛劾嚴嵩下獄故人不敢通

問筭時餽慰之因出爲口北僉事仇鸞巡邊多不戢  
筭以法繩焉拜僉都御史巡撫大同與總督楊順不  
協因忤嵩被謫戍邊隆慶初起撫甯夏移代雲中屢  
著邊功轉山西三晉安堵曾登賀蘭山觀元昊故宮  
有韓范功名亦等閒之句在邊所拔多名將居鄉不  
治田宅居舍湫隘所著有龍崗文集若干卷

丁士美字邦彥清河人避倭亂遷居郡城嘉靖乙未第  
一人及第時柄臣某欲以妻之姊子妻之辭焉在經  
筵日每進御前必以正言格論反覆開導神宗親書  
責難陳善四大字賜之五司文銜皆稱得人由太常

卿再進吏部左侍郎以外艱歸卒於家贈禮部尚書  
謚文恪

祝尚義淮安衛人嘉靖丙午中北直鄉試第一壬戌成  
進士以南陽推官改刑部主事雪理冤獄都人誦之  
陞潞安知府調鄖陽皆以廉慈著致仕歸藝業蕭然  
卒之日同年賙之始克殮

雲霓字時望桃源人歲貢生嘉靖中仕福建布政司理  
問陞泉州府通判賦性廉謹取與不苟攝晉江縣事  
民感其惠立碑洛陽橋以志不忘致仕歸足跡不至  
公府卒年七十四

邱度字志中淮安衛人萬歷丁丑進士授南康府推官  
有宦奴殺人占民田諸問官不敢直度竟歸民田而  
抵奴法監九江鈔關諸小負販多不問額亦不缺陞  
汝甯知府清慎推天下第一補歸德釋獄囚無辜者  
數十人有白衣冠闥道者曰沈宗伯奴笞之宗伯聞  
喜之人兩賢之遷潼關兵備道謝絕餽遺秋當監試  
以御史驕蹇不相能遂以病去起太僕寺少卿時某  
開府缺人當會推或諷之見當軸即可得度笑曰有  
呈身都御史耶晉光祿寺卿屬官挾中璫爲奸利劾  
罷之寺政一新卒贈戶部右侍郎初度爲秀才時館

太守邵元哲署齋太守念其貧欲周之可數百金度不受且辭館去日邵公不知邱生邱生自有問不患貧也其未遇時已如此

朱維藩字介卿淮安衛世襲千戶讓職子弟年十六籍郡庠生萬歷丁丑成進士授鄞縣知縣補上虞清操惠政始終如一舉卓異擢南京禮科給事中上疏勸朝講如初政建儲之疏公私凡七上條議疏淪秦淮引長江入留都荷金繪之賜陞江西按察司副使致仕林居十餘年野服角巾非狎見者不識爲貴人淮人嘗言朱公三絕謂絕足公門絕商士大夫絕口宦

途舊事也

舊志不言朱公曾官江西臬副按淮安府兩朝實錄備草載公曾爲是官又載公中憲大夫誥詞有云粵自南省升華風高譽謗乃以江西副臬望重澄清是知從南京禮垣陞江西臬副也遂取以補舊志之缺

沈柿字夢實大河衛人萬歷壬午舉人授榮陽知縣改南溪初仕榮陽邑大旱徧走羣祀至二仙祠祠下有池荷鍤濱之深不盈尺有雙鯉躍出四望雲滃然起次日雨又次日大雨徹三晝夜四境外旱取池水去禱又徹雨人皆神之旣改令南溪不久卽解組歸築攬勝樓著書課子其中逍遙林下者二十年所著有

游蜀記入蜀吟田間冷短草蛩吟諸篇

楊伯柯字直甫大河衛人萬歷丙戌進士授某縣知縣

舊志未載縣

名今無可考有惠政擢南京戶部郎中時帝久不視

朝伯柯疏言御大廷至樂居深宮至勞言甚剴切不報出爲汾陽府同知攝府事宗室之悍者以法繩之陞四川按察司僉事生平著述甚富有宗廟考求野

錄綱目訂正左傳摘疑東征客問隆平條議續秦吟

蜀遊記正名錄詩賦序紀數百卷

舊志不載爲令何地與南戶部何官至其曾官僉事但於選舉志載之亦不載何地今墓在城東七里塘墓上有碑載公爲四川按察司僉事淮安府兩朝實錄備草所載亦同又有南京戶部郎中楊

伯柯授奉政大夫  
述據以補前志之缺

劉世光字晦卿山陽人初名均避光宗諱改今名萬歷  
己卯舉人授英山敎諭聘福建同考官遷趙城縣知  
縣補沈邱仿古常平法爲社倉勸富民出粟實之復  
捐羨金市穀期年倉粟充溢遇歲祲所活以萬計賴  
州饑流民倡亂突至沈邱界居人蒼黃議請兵世光  
曰此饑民欲得廩糧活旦夕耳吾當自撫之遂單騎  
詣賊壘賊露刃相向乃以好言慰安之許給以社倉  
粟令安居境上毋妄動衆投刃羅拜旣得食貼服乃  
執其渠誅之餘悉解散撫按方交章上其功遂移疾

歸家居數十年所著有青藜館集子一臨以進士歷  
仕劇邑皆著能聲

張世才字德夫山陽人萬歷己丑進士授戶部主事歷  
陞儀制司郎中時儲位久虛冠婚不以時世才甫受  
事卽草疏白尙書上之又因三殿災詔問省譽之道  
復上封事請舉皇長子冊立冠婚諸典當是時諸臣  
請建儲者多得嚴譴世才所上封事前後數萬言神  
宗意頗慊然以其官守所在不罪也倭寇朝鮮兵部  
尚書石星誅于沈惟敬之說請封平秀吉于是東封  
議起世才力排羣議以爲不可及秀吉遣使以表入

謝世才再上疏力辨其僞島寇謀阻卒正中國之體  
方世才之請立東宮鄭貴妃已內諱之會順天鄉試  
有中式舉人鄭芬者文險怪有崩登望五等語不可  
解世才摘其語爲關節奏黜之芬鄭氏子弟也遂嗾  
其姻家給事中劉道亨摭他事誣劾之謫長蘆鹽運  
判官稍遷南京戶部主事再遷員外郎卒於官

吳棐字少溪山陽人萬歷己丑進士授聊城知縣聊有  
巨猾富而暴棐甫下車告者踵至同年某猾姻家也  
以情屬棐使勿治卒抵猾于法有諸生某娶貧家女  
既合卺以奩具不足反其女子母氏棐惡之將告學

使者治其罪生悔懼迎歸後女卒爲夫人歷陞大理寺評事

劉一臨字天幸山陽人萬歷己丑進士授常山知縣調長興又調信豐皆著異政爲鄉試同考拔士尤稱得人常山與沈邱相望父子以循吏同被撫按薦刻一時嘆羨然性高簡不能事權貴故屢調而不得竟其用初一臨之生也三日舉湯餅會同里王典來會飲問兒奚名曰一臨典大驚詰其故日前一夕夢神告典與劉一臨鄉試同榜今乃生耶衆客舉酒且賀且謔一臨七歲卽善屬文十六成博士弟子舉鄉試果

與王典同登丙子賢書年四十卒于官訃歸王典亦罷樂清尚來會哭

張和字培先山陽人萬歷甲午舉人乙未會試中乙榜授海康知縣決郡邑囚七十餘案縱遣幾千人陞順天府通判署推官大猾某白晝殺人以賄倖免和得知其情卒抵于法都人快之遷刑部主事歷陞樂平知府戍卒軍餉數萬收放悉以原鑑無所染指至禱風滅火祈雨蘇旱無不應驗以病乞歸卒

梁兆明字子晉山陽人歲貢生萬歷中選鳳陽府訓導深究王文成良知之旨教士以踐履爲先陞安義縣

知縣俗健訟輕生山有草食之殺人動以此自殞而  
傾人家兆明令凡訟者先納草一石從此根蕗盡絕  
民俗以變邑有水利阤于均區阻于豪右兆明盡正  
治之灌山田數十百頃陞南陽府通判歸著有語錄  
若干卷

閻世科字蟠楚其先山西太原人世居淮安萬歷甲辰  
進士授湖州府推官舊有疑獄屢讞不決夜夢神語  
之曰汝未有子宜留意祥刑覽以告其母母曰獄中  
囚必有當平反者及再錄果得囚冤狀遂出之人咸  
異焉又除蕭山盜窟夙夜頓去陞戶部主事歷陞山

東布政司叅議兼按察司僉事轉寧前兵備道叅議致仕歸

田舜年山陽人歲貢生天啟中授樂至縣知縣有善政邑人立生祠祀之崇禎末陞平涼府理刑同知加銜右參議寬刑獄弭盜賊郡賴以安

嚴詩字龍溪安東人萬歷中選貢授固始縣訓導陞廣昌縣敎諭修學宮嚴考課克盡其職遷衛輝縣知縣有行賄屬訟事者詩集父老焚香自誓治行賄者罪既以親老乞歸養

安東志人物傳作嘉靖十三年選貢選舉表載萬歷中注云缺年郡志失載

安孝字其止安東人歲貢生萬歷中選湖州府訓導撰  
孝行拯溺教焚書四卷陞虹縣敎諭著正已率物編  
聖諭訓士解慢吟集捐俸建韓成祠遷廣德州學正  
撰守令芳蹟三戒臆說尚行編砭俗歌攻玉瑣言遷  
永州府學敎授撰太極纂要義治事發明倫敎畧  
昏衢燭戒賄戒訟諸書陞山西晉府紀善纂吳興桐  
川夏邱芝城漣水文集五卷致仕歸卒年七十二萬  
歷二十四年吳興人祀于學宮

魯頌號藕田安東人以監生官濮州州判時歲大旱潔  
誠步禱甘霖隨降禾穉復蘇歲獲大豐撫按薦其才

調蓬州州判以老乞歸

張奕穎字毅孫山陽人崇禎庚午舉人屢上春官不第庚辰會試畢當寧思破格用人命下第舉人盡留特用謁廟釋菜立石題名如進士例授戶部主事監內十庫內十庫盡數也所貯物盡飽中璫橐而歲請帑金檄所司招買金朝出而暮復歸物之朽敗如故廉其弊悉條上之力清益源旬月省帑金十萬有奇通州爲糧儲咽喉軍興急稍稽時晷卽罹咎罰至褫削諸弊漕務一清畿輔大祲白骨滿道乃括諸倉陳粟以哺饑民全活以萬計丁內艱歸終身不復出大司

馬史可法開府淮揚強起之與晝城守計議據要害聯土著治城隍更番出望淮恃以無恐未幾卒

孫桀字不踰鹽城人崇禎癸未進士授上虞縣知縣甫下車卽懲土豪之害民者羣姦股票以才調會稽旋歸里桀未第時留心地方利弊條陳開湖築隄諸大事上之當事及遭河決又著被纓集以紀其事鼎革後益閉戶著書不與外事有初茅軒集亦因雜刻行

世

舊志載桀爲前明人鹽城志載桀爲本朝人按桀中天啟甲子鄉試崇禎癸未進士謁選在甲申見淮安詩城調會稽未久卽掛冠歸隱始終一節其爲明人無疑鹽志非是當改正

李得陽號健伯安東人歲貢生崇禎中選宿州訓導土  
寇起乃部署州人設牙標二營出奇兵破賊又剿刀  
山寇多所斬獲淮撫才之召置幕內叅贊軍事將以  
監軍職授之移疾歸後復官錢塘縣敎諭攝富陽縣  
事多善政

張金字毓菴安東人崇禎中由吏部通吏考選鄖陵縣  
典史陞祥符縣尉攝縣事河決荆隆口百計堵築誓  
于河神將以身殉不日遂塞土民建祠于汴梁隄上  
名張公祠至今禱賽不絕陞王府長史致仕歸

易會極鹽城人歲貢生崇禎中選含山縣敎諭署確山

縣事時流寇猖獗圍城兩月殲力堵禦士無變志撫按以守城功薦補確山縣知縣積勞成疾遂乞骸骨歸

沈純字一之山陽人成化己丑進士由刑部主事遷郎中廉明愷悌多所平反歷陞山東叅政吏民畏愛東人祠之陞四川右布政革朔望茶果銀除通省積年弊竇未幾致仕歸品望益高卒祀鄉賢

潘城字邦衡山陽人正德中歲貢生選河南磁州訓導嚴立教法興起士類致仕歸爲鄉飲大賓年八十四卒

葉恩字永錫山陽人嘉靖庚戌進士授榆次縣知縣調歸安不畏強禦浙民號曰鐵面擢河南道御史時國戚宦官恃寵驕恣有茅某以不法聞章七上卒論如律宦官隱蔽群盜撫按不敢言抗章論奏根株殆盡又劾浙督李天寵失悞軍機詔逮問直聲震一時爲忌者所中以巡江差致仕歸子允武字健菴邑廩生時有文入武闈之例遂中萬歷癸巳科武會元未仕卒

阮嘉林字仲立大河衛人嘉靖辛酉舉人壬戌會試副榜第一授益陽縣知縣俗獵悍難理嘉林廉敏幹練

不爲所窘久之案牘漸希乃以餘暇立書院與邑諸生相砥礪三載報最第一當內擢臺省會有大吏私人坐法當死大吏故分宜黨微示以意嘉林執法不撓卒抵罪于是以他事中傷之解組歸居林下數十年年七十一卒

李潤民字青原山陽人萬歷甲午舉人授平陰縣知縣有政績再補武城剪衙蠶懲土豪境內肅然值隣封冠警倡率忠義申明約束賊不敢犯後沒于任

岳鍾秀字完懿山陽人萬歷丁酉舉人兩中會試副榜任新野潔已愛民邑大治擢天下清官第一行取刑

部主事時縣庫有羨金六千兩吏乘間以進峻却之  
恤刑雲南活死罪一百五十人備兵瀾滄兼攝六道  
篆地雜苗蠻頑劇難治遲久不得代爲之安輯撫馭  
條上方畧俾各得所晉甘肅叅政囊橐蕭然不能備  
輿馬告歸後老屋數椽閉戶若述人罕得見其面所  
著有類說一百卷

張吏部  
新標傳

潘叔暘字義若山陽人萬歷乙卯舉人任招遠縣知縣  
招遠瀕海小邑值遼事方亟徵兵旁午民多逃散叔  
暘招流徒教稼稽保境息民民以不困巡按御史推  
治行第一以忤權貴照常例陞馬龍州知州尋擢白

簡罷歸所著有匪莪室詩集妻仲氏亦善詩

潘嗣袞號素水山陽人泰昌年恩貢生授新鄉縣知縣時民多以養官馬傾家嗣袞立馬政碑官自養馬不以累民以內艱去後陞延慶州知州時邊備久弛兵士不及額邊將多冒虛餉嗣袞盡釐革之督撫檄兵備勘折額冒餉罪邊帥嗾之密賄西廠中傷遂被逮久之得釋歸所著有素患稿

楊士傑字瑞棠山陽人縣諸生以佐漕撫路振飛擒斬僞官功貢入太學廣昌伯劉良佐召叅其軍事尋使攝霍邱縣霍方歲饑上官猶責常賦力請蠲免且勸

分賑民乃獲甦未幾明亡遂棄官歸

國朝

劉自竑字任先山陽人崇禎甲戌進士累擢刑部郎中  
贓吏某當得罪欲以賕免竑却之仍寘之法出爲真  
定府知府故事太守有折麥銀歲二千兩竑免之遂  
爲例陞井陘道副使順治初陞浙江按察使時新罹  
兵燹民間多以逆首株連多人竑察其冤者槩釋之  
晉湖廣右布政未赴任乞休歸

邱俊孫字顥之淮安衛人崇禎癸未進士授戶部主事  
兼兵部職方司主事督四鎮餉順治初 王師下江

南疑六合民有變俾率兵往屠之俊孫駐兵十里外  
單騎往諭父老感泣出迓不戮一人而返授刑部郎  
中出知漢陽府一疑獄十年不決爲質諸神夜勘之  
兩造皆中其隱勘畢引燭焚其卷凡屬邑以獄上立  
斷遣之讞語悉口占手判不假手于羣吏吏無所容  
其奸擢冀寧道叅政所至皆著惠愛罷官歸里杜門  
却掃長吏罕識其面

周冀字肇敏淮安衛人中崇禎癸未進士順治初授南  
京戶部主事榷龍江關數月正課足一切商稅悉行  
寬免陞員外友愛二弟篤於交誼賓至如歸未幾卒

於官子鼎元有詩文名康熙丙午雲南舉人授順昌縣知縣補繁縣以廉著

潘董帷字小董山陽人少爲諸生有名本朝定鼎羅士之有才行者以補州縣教職之缺董帷得漳浦縣敎諭兵革之際立敎三年士風不變尋以外艱歸遂不復仕

汪之光字白生清河人崇禎中拔貢生授澄邁縣知縣時海外黎亂破臨定諸城將攻澄邁光以城小不足守不如攻之于是率鄉兵夜半迎賊大敗之生擒數十人上官驚異以光著生能殺賊遂檄光相機撫勦

便宜行事又令攝隣邑光乃各設置長盟兵互爲聲援屢有擒斬四境獲全撫按會薦歷官分守嶺西海北南道右叅政移疾歸順治初王師聞黎遂平粵仍命光爲招撫諸黎悉降以母老乞致仕未幾卒從清河志

增  
河志

胡之駿字伯驥山陽人順治丙戌進士選庶吉士累陞工科右給事中言論風裁爲時所重辛卯典福建試卒于可及戊戌進士授河南濟源縣知縣和平寬厚頗著循聲

王家禎字挺生山陽人順治丁亥進士歷新安龍游奉

新三縣皆有政聲以外艱歸補荔波荔波兗鷺好殺  
縣無城郭舊令皆僦居慶遠秋冬時間至其地頑到  
官乃創城邑倉庫官私廬舍遂徙居焉苦土司不時  
刦畧乃爲書開陳利害布上威德獶悍馴服民獲安  
枕復清田畝設塘舖撫流離建學宮居粵五年撫按  
交薦擢兵部主事兼理九門提督事未幾卒

王世疊字春如鹽城人順治丁亥進士任宜黃黃處萬  
山中民苦挽運力請上官得改輕齋又土寇竊發密  
捕其魁誅之民遂安堵後知寧都寧都魏禧兄弟隱  
居金精翠微峰下行式廬之禮無何解組歸

黃宣泰字蘭巖山陽人順治己丑進士授大理寺評事  
多所平反應 詔陳言疏多剴切降行人司司副後  
擢寧夏兵備道副使值定邊城花馬池之亂城堡皆  
陷宣泰堅壘以守調度有方糧芻無缺又弭輯亂兵  
分兵扼河賊不得渡一時邊境恃爲長城猝聞母訃  
以過哀卒子之嵩由監生授高州府通判以征徭獵  
功陞廉州府知府

張新標字鞠存山陽人順治己丑進士時漕使者任諸  
蠶胥播惡江淮間新標甫釋褐卽上疏發其狀賦私  
累巨萬下巡按御史案驗得實竄殛有差一時嘆異

授中書故相國陳名夏得罪死無敢收其屍者新標  
慨然製棺衾往殮之而絕口不言其事擢吏部考功  
司主事引例廻避改戶部坐失察鄰部主事事謫黑  
水監驛丞歸晚舉博學宏儒以老病辭

劉芳聲字何實山陽人順治己丑進士授刑部主事審  
決畿北執法平允全活甚衆疏請清理刑獄于是

特遣恤刑諸臣分讞天下芳聲亦在遣中遷戶部榷關九  
江釐剔宿弊商旅雲集擢山東提學僉事卒於官

卜永昇號淡菴安東人順治己丑進士授郊縣知縣補  
修武致仕歸永昇性孝友博學能文歷仕皆有善政

歸輯安東縣志

從安東志補

徐越字山琢山陽人順治壬辰進士授行人擢御史謙直敢言在臺十有三年上書言事五十有九皆關時政之大者其言漕河事先後凡十六疏歷陳黃淮分合變遷及兩河衝決州縣被災狀尤悉遷兵部督捕左理事官引疾歸所著奏議四卷子覺由監生官武宜縣知縣懲強暴興文教政績甚著

陸求可字咸一山陽人順治乙未進士授裕州知州擢刑部員外出爲福建提學僉事轉叅議未任卒求可少孤力學博綜羣書及守裕州恤郵丁減鹽引開荒

田清冤獄累著循績督八閩學政釐正文體杜絕請  
托閩士至今能道之

邱象升字曙戒淮安衛人俊孫子順治乙未進士選庶  
吉士授編修進侍講以才堪外任調瓊州府通判旣  
之官道出徐聞縣防兵以缺餉大譁城門晝閉象升  
直前諭之衆遂解甲聽命瓊倅職司撫黎黎恃險梗  
化乃密簡民兵禽斬首亂餘悉懾伏平南王藩人橫  
甚說其婿金某啟王治其爲民害者十餘人還民田  
廬畜牧無算廣人大悅移武昌府通判弭通城縣民  
變所全活幾千百人以內艱歸起補大理寺左寺副

駁部議之不合律者又引春秋韜在死獄 詔皆從之請歸省侍子舍者五年以病卒象升少負才名善詩賦尤敦友誼所著有南齋詩集

楊名耀字修野山陽人順治乙未進士初授刑部主事後擢掌文選澄叙有方雅有清望一充會試同考所甄拔多名士遷太常寺少卿郊廟大典罔不中禮

詔使泛舟西苑賜宴給綵幣蓮藕恩遇之隆一時無比未

幾卒於官

薛鼎臣字式九鹽城人中順天鄉試累擢兵科給事中甫踰歲疏凡十二上其摘陳時弊以杜貪源尤切中

要害轉工科疏論五大險工皆防河急務庚子主湖廣鄉試有知人名弟薈臣卒遂請終養歸時年三十二僅五十而卒薈臣順治丁酉舉人早負才名未壯歿

陳羨典字碧涵山陽人順治戊戌進士選池州府學敎授池陽七科無舉鄉試者羨典振興教化指示有方嗣後科名不絕丙午同考浙江老宿多出其手陞沂水縣知縣減罪輕刑尤多惠政卒年七十餘

嵇亮字南軒安東人康熙中由歲貢生選合肥縣學敎諭以經術相砥礪陞國子監學正國家徵經明行修

之士擢翰林待詔引入起居注兼兩館纂修丙夜勞  
瘁不負厥職以內艱歸服除不起優游林泉年五十  
三卒從安東志補

沈漢字天河鹽城人順治戊戌進士授宣府推官首革  
馬快之積蠹者開釋無辜擒勦遺寇風采卓然調遵  
義尋以裁缺罷歸遂不復仕鹽城地少薪木舊例河  
決必責協濟柴柳轉購他所民不堪命漢爲力懇當  
事遂獲免桑梓德之

張樹屏字建侯鹽城人順治戊戌進士授臨縣知縣侍  
母病三年衣不解帶及蒞臨邑捐公餘銀三千五百

兩並免修城加派銀九千餘兩潔已奉公臨民感之  
劉昌言字禹度山陽人順治己亥進士授岑溪縣知縣  
捐祿煩苛杜絕請托士民安之邑產毒草人有小忿  
輒噉以自斃乃嚴令禁之草自是不生縣接五嶺猺  
獞雜處會隣縣賊彭奇糾黨壓境城中兵士僅三十  
人乃躬率吏民激以忠義登城固守賊不敢犯又出  
方畧誘之賊黨遂縛奇以降並獻同盟姓名冊昌言  
焚之全活數千家攝蒼梧縣事卒于官子愈始恢皆  
進士

金星賁字西白安東人由監生官中書改宏文院典籍

後任莊浪衛同知時吳逆作亂西陲響應水橋悉爲賊據多方籌畫緝牛皮爲袋使軍士按之渡河以濟大軍河東州縣賴以恢復 王師進勦巴蜀轉輸孔

亟隨營入川屢著勞績事平陞莊浪道僉事歷陞布

政司副使生平慷慨有爲安東漕米額請改色邑人

德之從安東志補

楊才瑰字賦臣山陽人康熙甲辰進士少爲諸生有名當鼎革時父爲讐家所誣以不難髮被逮才瑰涕泣從行夜伺父熟睡盡剪其髮而吞之父得不坐久之得腹疾夜夢人授以良方服之果愈丁酉舉於鄉會

有發科場弊者

章皇帝震怒御太和殿親試他皆穀鯀無人色才瑰獨自負以爲必得果膺顯擢次年再試仍在高等撤燭賜饌極一時榮遇成進士累擢兵部武選司主事疏通選法一時稱便以疾乞歸年七十七卒所著有甘一史纂要子九霞康熙丁卯舉人幼穎敏絕倫蕭山毛大可作神童歌贈之未及仕而卒

李時謙字吉爻號蘓菴山陽人順治辛丑進士授潞安府推官以裁缺改樂陵縣知縣誅姦民懲健訟後擢河南道試監察御史因歲當甲子密疏請停本年秋

決並民間一應死罪量減以應昌期 上可其奏所存活無算又疏言河工事宜皆奉 俞允補御史六月卽有河東鹽政之命奏除加徵割沒諸稅期滿復命以他事鐫職歸里未幾以薦復補湖廣道御史時御史張某以言事獲罪時謙抗疏論之 上是其言釋不問以例外轉得陝西糧鹽道釐倉廩積弊革收糧陋規兵民交悅以積勞卒弟時震同年進士官中書舍人乞終養歸絕意仕進以詩酒自娛所著有去來吟行世

劉謙吉字六皆山陽人康熙甲辰進士授中書出參撫

遠大將軍幕條議用兵六事皆中機宜入補刑部主  
事獄多所平反出爲恩南府知府戒屬吏諭土司  
懲健訟之弊除逋商之累一郡稱治恩南僻處天末  
文風不振士鮮獲售者謙吉教以讀書作文之法一  
時捷秋闈者四人後有領解者膺卓異陞山東提學  
僉事期滿以老乞歸構一簷園日吟咏其中年八十

七卒

賈之坊字仁侯安東人順治中歲貢生授靈璧縣訓導  
改祁門厚重端方綽有師範陞宿州學正修葺學校  
殫力十年擢恩縣知縣民有賈知縣真父母之謠以

老歸從安東  
志補

陸騰駿字馭之清河人順治中歲貢生授懷柔縣知縣  
攝密雲縣事清豪右侵占民田斷久繫疑獄代完密  
邑逋穀千餘石豁重編四百餘丁遷西城兵馬司擢  
戶部主事監鑄督關各著聲績先是豫省有以墾田  
進秩者加糧二萬民多以賠累致死乃力請免之以  
病乞歸卒

鄒嶧字桐崖山陽人康熙甲辰進士授中書隨安親王  
南征耿精忠有功擢建昌府知府建昌當逆藩倡亂  
之後郡縣殘破人民逃徙大軍往來供億浩煩且游

魏嘯聚時來攻擾嶧以次恢復諸旁邑間出奇計破賊招安叛逆解散黨與拊循良善由是招逃戶墾荒田事皆就理調攝滿漢官兵使各効命政績丕著守建昌八年陞雲南提學僉事期滿遷山西冀寧道副使卒

王兆熊字玉鳬山陽人康熙丙午舉人授安平縣知縣冰蘖自矢頗著惠愛有窮民鬻兒完糧者亟捐俸贍之邑民素多慄悍兆熊勤宣

聖諭作爲通俗解一書剴切明暢人人易知俗以漸革在

官二年卒

邱象豫字仲慎淮安衛人以貢生選濬縣縣丞繼任處  
城安仁二縣性慈惠而於豪強則不稍貸撫循喚咻  
民賴以甦復補澄邁瓊山遠隔嶺海澄邁又其鄙邑  
黎人窟穴其間象豫結以恩信莫不帖然聽令舊命  
案就檢主者必先納大紅袍價若干錢蹙然曰民不  
幸遭此等事尚忍需索及此乎亟禁絕之俾永爲例  
後署崖州事歸子綸以貢生補敎習選安化縣知縣  
補棗陽所著有水西吟一卷行世

汪灝字素臣山陽人貢生任黃岡縣知縣邑當附郭水  
陸衝繁灝在任八載卓有循績督撫彙題保舉值

夏包子之亂黃州不守懷印請授隨大軍進勦督擒  
賊首克復郡邑以積勞致疾歸

許國璠字秀升山陽人康熙丁未進士任故城縣吏才  
明敏聰斷無冤不事催科而事無不集士民頌之從通志

補

劉始恢字介人山陽人康熙庚戌進士授大理寺右評  
事法司讞獄有於情罪未協者奮筆駁之爲兩議以  
上獲  
俞旨依後議擢文選司郎中苞苴請託一  
切謝絕時河臣建束河注海之議下河七邑岌岌不  
保始恢與寶應喬萊等建議力陳其不可事遂寢嘗

同考順天主試福建皆稱得人致仕歸

金人望字道騁安東人康熙壬子副榜貢生任長武令  
謁選前一日夢七人匍匐堵下乞命甚迫心異之蒞  
任慮囚有閼爪子等七人宛若夢中所見鞠之則以  
响馬案殲煉成獄罪皆應死人望廉其冤力爲請豁  
七詳始得允時邑苦旱破械日大雨霑沛陞同州知  
州充己卯鄉試同考官副榜入闈自此始晉莊浪同  
知邊疆嚴邑軍興旁午肆應畧無支絀時親王領軍  
者褒獎特至尋以老病乞休不允遂卒於官

邱五典字徵五淮安衛人康熙壬子副榜貢生以臨川

縣縣丞累署豐城樂安萬載吉水諸縣事時江右初  
催兵燹而豐城更爲煩劇撫循釐剔所至有聲在豐  
城築傍江隄岸以護民田力役惟均人不知苦因號  
曰邱公堤撫臣至榜其事爲諸縣式以公事詿誤罷  
官去

張廢字涵白山陽人康熙己未進士監督通州倉置積  
蠹數人於法累授戶科給事中條陳河工事宜仲莊  
閘之開從廢請也不三四年遷左副都御史典試陝  
西秦人翕然稱之 本朝用大臣典鄉試自廢始又  
三年陞刑部右侍郎悉心詳讎未嘗枉一人釋諸案

中之拖累者年七十一卒於官

何源瀓字崑孚山陽人由貢生授建寧府通判值耿逆  
背叛家屬盡陷賊中隻身赴浙江請兵陳恢復大計  
隨大兵進剿賊敗以功授紹興府知府時山寇海氛  
所在梗化會合諸郡兵宣布威福渠魁授首首捐贖  
軍中被繫婦女復補馬湖府時方興楠木之役驛騷  
半天下馬湖居萬山中運木之夫墮崖墮死者不可  
勝計源瀓傷之著木政一篇備言其苦懇監司上陳  
竟罷茲役陞浙江督糧叅政後歸

何寬字而立山陽人康熙乙卯舉人耿逆之變母李氏

留閩中音耗阻絕寃經歷險阻出入戎馬鋒鏑中得  
達母所保護無恙任保定平遠二縣知縣平邑山多  
田少民間惟知種稻入春以後卽餬口無資寃教以  
種麥之法一歲兩獲有秋民食遂足鄰邑皆取法焉  
以憂歸遂不復仕

劉愈字文起山陽人康熙壬戌進士官工部屯田司主  
事少隨父令岑溪助父與賊彭奇戰賊箭從喉旁過  
著關壯繆廟旗竿上愈不爲動事平岑人目其箭爲  
孝子箭其官工部也憫舖戶之苦爲力減浮費堂上  
官信其誠每事多就詢之時有言海運之便者愈力

持不可言者無以奪以內艱歸遂不復出

吳寧謐字靜公山陽人康熙甲子舉人選廣德州儒學  
學正初到官凡學中舊事弛廢及習俗沿訛者皆考  
合典禮將以誠敬州人舊不諳於喪禮承重除服多  
踰古制急進諸老成士爲之按據禮經徵引書儀家  
禮及朝廷律例反覆辨論然後人心漸有所憬悟州  
志最多訛錯摘數十事各加考證創爲新樂府三十  
二章以申解之又以俗奉祠山神言多荒誕乃校刪  
山志作辨一篇以正其誤出入經傳極有根據性好  
客雖令署坐客常滿善書法求者無虛日一日方執

筆作字字未竟而疾作遂卒

許肇起字敬臨山陽人康熙乙丑進士授嘉興縣知縣多善政有僧以淫犯法行重賄乞免貯金於庫卒論如法太湖爲盜藪嚴立保甲緝獲數十輩自是群盜歛跡吏治之暇究心理學留意河防所著有朱陸異同辨河防獻曝等編行世

周恂字子敬山陽人當吳逆梗化走軍前陳勦寇策用其謀擒獲賊首叙功授靈山縣知縣邑有大盜橫行官軍不敢問恂潛選鄉勇直擣其巢一鼓擒之陞寶慶府同知楚多崇山當炎暑時行人煩渴思勺水不

可得拘於峯磨嶺植茶數百畝每里許置一茶棚行人便之擢紹興府知府雪沉冤折誣害人不敢欺嵊縣大南山有巨賊杜某殺鎮守官兵將入寇上虞四邑俱震動恂曰此賊耳易取也乃廣置間諜探其虛實潛兵置伏截轎重焚棚寨寇窮遂投首以失上官意罷歸

施有光字爾賓山陽人廩貢生任畧陽縣知縣值隣郡大旱流民入境賑粥施藥全活無筭署郡丞事有雞頭嶺賊盤結嘯踞有光單騎入山諭以禍福賊遂解散陞涇州知州前官命盜大案積十餘事歲久未結

甫抵任卽立清之致仕歸里年八十一卒

任三益字友謙山陽人由監生選濟寧州州同三益生長淮南習知黃淮要害時靳文襄公方總督河道每大工役必就加諮訪贊襄擘畫不遺餘力擢武岡州知州武岡爲古黔中地壤接溪蠻民多豪猾視事後寬猛得宜士民信畏事無弗理未幾歸

倪典學字又次天河衛人康熙丙子舉人選長洲縣教諭兼入紫陽書院督課諸生訓迪造就著有成效郡守梁公委纂吳郡志畧體裁嚴謹詳簡合宜

楊開沅字用九山陽人康熙癸未進士

命直南薰殿纂修方輿考略

上問淮揚朝士以下河河道情形並泰州龍開河事兩繕  
摺奏條對詳明屢獲溫

旨恩賜優渥選翰林院庶吉士授編修 命於武英殿註  
解御選唐詩又 命廣月令輯要博考羣書精心箋  
釋每至夜分不倦癸巳充會試同考官開沅學問淹  
博少從顧大令諤講性命之學得甬上不傳之秘後  
尤留心河防水利講求融會撰河論數十篇與同鄉  
閻徵君若璩張檢討鴻烈書札往復津津辨論不置  
惜未究其用而卒

阮應商字次廣大河衛人康熙癸未進士累陞戶部郎  
中本司轄各省糧儲並京通各倉事既煩冗胥吏尤  
以舞文納賄爲常例應商到任踰月卽以裘服踰制  
笞其尤者羣吏股票自是諸弊肅清擢刑科給事中  
上特叅銓政疏縷指弊端皆中肯綮下都察院議吏  
工二部堂司官皆獲處分一時風采肅然丁酉三月  
以疾乞休逾年以疾卒

邱璋字麌梧淮安衛人以廩貢生補敎習選溫江縣知  
縣縣故凋敝城中戶不滿百凍餒遍四境璋銳意撫  
恤始有生意復當西藏兵興使命絡繹需用不貲璋

皆捐俸營辦間井晏然陞全州知州州民置田多寄居大戶名下久之豪強者遂奪其田民多以無據訟不勝璋曰果爾田則賦當爾納有歷年印票可驗乎奪田者詞窮服罪累擢潞安府知府盡出倉穀以賑隣郡饑民贖樂戶所買良家婦女歸之其人代完屬縣帑金盡除死徙戶籍治潞十年以疾卒

劉永祿字天馭山陽人工部屯田主事愈子康熙丙子副榜貢生以教習謁選得長寧知縣長寧多瘴癘人或爲之戒曰死生命也君命焉所避於是搜圖志又訪諸常往來於廣南者得其利病甚悉抵任後勤於

撫循革一切陋規御吏甚嚴有爲盜所妄扳者力脫之率卒驅墳賊於深山中覆其巢塞斷龍口賊皆遠遁又置保甲練義勇諸所設施皆漸有緒乃竟以瘴病死

張鍾字聚三山陽人刑部侍郎睿仲子康熙己卯副榜貢生任江山縣知縣江山彌望皆山田苦無水乃捐俸鳩工興修水利疏泉浚塘農用不匱陞沅州知州沅地苗蠻雜處頑梗不服大吏意在用勦檄鍾爲先鋒鍾至開誠溫諭夷人感泣歸化後陞饒州府知府在饒七年盜賊無一竊發建號舍置書院皆捐俸爲

之養廉外一無所取兩攝道篆皆有政績後以老乞

歸卒

鄒增字學山山陽人康熙己卯舉人少窺洛閩諸書爲生徒說書超引入勝無復講章語登賢書後屏絕人事惟閉戶讀書晚官長洲教諭正身率士不事干謁嫌長洲文字少根抵教誨勤懇鞭策近裏於韜晦之士尤喜物色接引之以病歸里卒

李琬字荆輝山陽人康熙己卯副榜貢生由敎習授蒼梧縣知縣革陋規平徭役甚有惠政有假冒王府名號所過索供億甚張琬立擒治之有富戶殺人當抵

罪當事者欲脫之力持不可梧人頌其明甫二載以  
末疾乞歸

陳善字謂敬山陽人康熙中拔貢生授鐵嶺縣知縣鐵  
嶺爲 與京重地山海咽喉滿漢錯居善勤於撫  
字以德化民不事敲扑而事無弗理在任五年以老  
致仕

安如泰山陽人由監生授陽武縣知縣邑因防河協解  
木石汎買埽柳最爲民累力請於上官得歸改折由  
是一邑獲甦其他築城濬池修葺學校在任十五年  
邑人安之擢刑部主事卒於官

楊霏字岵瞻山陽人太常少卿名耀子由貢生選內府中書交游延接傾動一時陞溫州府知府疏通泉脈以溉田疇豁免牙稅以紓商困行保甲以絕盜源絕誣扳以重民命甫及一載遽卒於官

潘建功字平潞山陽人康熙乙酉舉人授長洲縣敎諭修舉廢墜考核典禮修三樂堂建敬一亭招諸生就署肄業晨夕講貫無間寒暑凡弔喪祝壽絕不一至富商大賈之門吳人高之

張鉞字左黃刑部侍郎睿子康熙乙酉舉人累擢刑部主事出署貴陽平越二府事佐制府平長寨夷實授

恩州府知府調黎平總軍務征古州苗所獲囚俘悉  
釋縛遣之使招徠其黨與自是歸誠者踵至陞貴西  
道旋擢廣西按察使數歷行間歷三寒暑勦撫咸中  
機宜築城古州遂稱巨<sub>鎮</sub>調貴州按察使未幾復還廣  
西陞布政使蒞任四載以病乞歸卒

周正紀字子戴山陽人廩貢生任永城縣知縣適中州  
大水常平無穀可賑乃使子歸鬻其產糴粟以濟饑  
民全活甚多

邱志辰字公李淮安衛人由貢生効力河工分防楊村  
爲糧艘經行要地一日衆艘聚鬪砲矢交加事勢不

測諸武弁皆袖手遠避志良獨駕小舟直前叱止之  
衆不敢犯有要人持內府票勦占民間輦地者厲聲  
與爭持其人將與訟於朝事乃得寢卓異陞璫山縣  
知縣有婦人訟其夫被殺而無主名者辭未畢簷瓦  
忽墜夜禱於神夢秋瓦二字思之不得其解私訪至  
城南門見有携瓦壺者心動問其名曰吳那秋乃拘  
問之一訊卽服邑人服其神明以禱雨積勞卒

陸志默字母躁山陽人福建提學僉事求可子由廩貢  
生選英山縣敎諭邑當明季兵燹之餘頽廢已極首  
捐己俸倡率紳士廟學爲之改觀講學會課皆克盡

厥職一攝縣篆於民間辭訟事尤不染指以恩例應  
陞知縣未任卒

劉信嘉字孚衆山陽人康熙乙未進士少彷朱子西山  
讀書分年法畫以歲月務強記手錄幾數百卷釋褐  
授廣西岑溪縣知縣岑居萬山中與猺獞雜處多所  
剽掠乃嚴保甲緝奸宄一年之後夜戶不閉岑舊立  
里冬令官府所需一切責之至鬻產破家信嘉禁革  
之民以不困歲饑請賑官所發少不足給數日食乃  
不俟詳請盡發倉粟以貸民所全活無算有刦盜殺  
人未獲武弁使他盜自誣服信嘉察其情得免死者

三十四人一充同考官兩攝懷集縣事皆有聲

邱鏞字惕若淮安衛人康熙乙未進士與弟鎮同登癸巳賢書登第後授隣水縣知縣隣水民朴魯鮮知讀書者鏞進其秀者教之躬爲指授然後人知向學民風爲之丕變未幾卒於官鎮授安溪縣知縣有能聲兼攝惠安稽覈有術吏胥無所容其奸惠民感之亦不久卒

任三槐字晉公山陽人以監生運糧征噶爾丹事平論功授寧陵縣知縣在任十九年輕徭省事與民休息疲困漸甦以資陞越州知州又陞辰州府同知皆未

之任卒於寢

邱如升字養正淮安衛人冀寧道副使俊孫子以貢生選常寧縣知縣邑處南服苗民雜居因小隙輒露刃相爭鬪如升厲法禁稽察出入使不得結隊群行又禁吾民之與爲貿易者平其直無所欺侮擇其馴謹者勸導之而懲其一二最獷悍者由是苗民帖然無事以終養乞歸及服闋特授鞏昌府靖遠同知時軍興旁午如升以幹員辦理事集而民不擾偶因公事詐誤去職當事惜之

楊繩祖字景西山陽人太常少卿名耀孫康熙辛卯舉

人任博平堂邑范三縣俱有聲丁內艱歸服滿補浙  
之嘉善縣通邑漕白不下十餘萬當天下五十分之  
一徵收時盡釐宿弊畧無餘羨爲從來所未有力欲  
行嵌田法未果以疾卒於官

黃之璜字公得山陽人寧夏兵備副使宣泰子由廩生  
保舉賢良方正試阜平靈壽二縣皆絜已愛民皭然  
不滓旣授開州州判清操如一以老乞歸貧逾未仕  
朱霞字東彩安東人雍正中以廩生舉賢良方正授宜  
城知縣設教禁變強悍之俗除八市陋規免生監差  
徭頗多善政未幾移病歸從安東志補

劉培元字萬資山陽人雍正中拔貢生以世父岑溪令  
信嘉保舉授虞鄉知縣虞鄉初併臨晉時新復舊治  
彊畊未定民以輸賦不便環馬首請者百餘人武弁  
妄以聚衆脅官告盡逮治將置重典培元泣請諸大  
吏久乃得已舊制輸稅銀每兩重部平五分官歲得  
耗羨千餘金培元至悉除之一準部法虞民歡聲雷  
動然坐是重困去官日負帑金八百兩貧不能給薪  
米邑人爲合力償所負且日致餼焉在官二年以郡  
守累削職疏入

世宗識其名命留咸安宮敎習以病乞歸卒年四十四年

舒方鞏字渭川山陽人以監生運糧征噶爾丹錄功授  
鄧川州知州邑當用兵後四境蕭條瘡痍滿目鞏招  
集流亡賑卹窮困期年後漸有起色方逆藩倡亂時  
私立嚴刑非律例所載如銅夾棒鐵腦箍之類事平  
尚在獄中方鞏立請燬之視事四載以觸忤上官歸  
胡醇仁字令遠淮安衛人由監生選柳州府知府改授  
平樂立社倉平穀價嚴田地之推收寬私鹽之負販  
邑爲猺獞雜處跳月唱歌夷俗最熾乃立嚴禁禁之  
俗以漸革修宋賢鄒浩道鄉書院延山長課士其中  
以倡文教一郡大理又值西隆獮賊跳梁督兵進勦

親冒矢石覆其窟穴縱兵深入沒於行間事

聞賜白金千兩以歸旅櫬聞者傷之

朱恒字方立安東人由廩貢生選天長縣敎諭長才肆應不爲寒窶苜蓿所苦修明倫堂建文峯閣葺齋房數十間選生童肄業其中以內艱歸里哀毀致疾未及練遂卒

賈槐字念先安東人雍正中拔貢生任安邱縣知縣革供應銀三百餘兩創造磚城建立義學復置義田以養孤貧方膺薦剡以疾卒

沈頊年字師綠鹽城人雍正中由諸生保舉効力陝西

軍前授靈臺縣知縣才能優裕鄰有疑獄輒委審理  
嘗決隆德積年疑獄上官才之俾兼攝隆德事勘新  
渠寶豐二縣被水田地詳請免稅者三千餘頃調整  
甯夏甯邑新遭地震官民死者數萬城郭廬舍悉成  
灰燼萬事創建案牘填委服勞盡瘁竟卒於官

汪元運字應五清河人雍正中歲貢生選荆溪縣訓導  
生平篤于孝友雖舌耕餬口而養生送死之累不以  
旁貸及訓荆溪嚴立課程抑遏奔競賑貧修學卓有  
實績以老卒於官

任宗延字彭年世居任城明中葉遷淮遂爲山陽人初

從選貢值

仁皇帝西征効力軍前主餽餉軍食不乏以勞授戶部貴州司主事累陞工部虞衡司郎中出守福建延平府署延建邵道事致仕歸宗延性寬厚喜談經世大略在戶部日稽覈關稅絕苞苴榷稅者不敢苛征寶泉局錢舊日官爲清雜取橐錢多濫惡奸民牟利盜鑄嚴法不能禁宗延權子母輕重定爲程式公家無所贏盜鑄不禁自絕有司屬鈎通戶部大庫官吏盜庫銀三千宗延廉得之白尚書尚書卽屬逮訊宗延召諭之曰爾等所犯無活理能于三日內還所盜銀我

白尚書貸爾死翌日銀具活數十人初守延平屬邑順昌賊盧某擁衆二千人與漳泉土寇相應和勢張甚聲言取城城中洶洶思竄宗延急召兵百人疾馳百二十里抵順昌獲賊謀杖殺之而賊衆已集城下宗延開城門殺賊夾水而陣矢石雨下不爲動明日昧爽賊從上游濟宗延屬游擊某迎擊而自以精兵待戰日晡戰方酣出奇兵夾攻賊走殲諸河渠帥遁入山山界三省袤數百里宗延與相持四十日卒獲斬之境內肅清捐俸葺揚羅李朱四賢祠爲龜山後立祭田延俗信鬼祠內身佛男女雜遷宗延爲毀其

祠民大駭繼而卒大悅服在延十年丁外艱歸遂不出年止五十餘耳優游林泉三十年年八十一卒

淮安府志卷之二十二上

、將略

將不同有智將有勇將智勇備爲上將勇以智生謀畧是也淮俗舊稱勇悍習戰鬪而楚漢之際淮陰侯信特以將畧聞跡其忍耻乞食受辱跨下勇悍者固羞言之洎乎登壇一對折衝千里不旋踵而定三秦又豈習於戰鬪者所能及哉其後射陽人王敬則以善拍張聞於齊史稱其跳刀高與白虎幢等而隋有張齋唐有張雄及馮宏鐸之倫亦俱以將顯宋元迄明代不數人人不一軌勇悍之俗弗衰而習戰鬪者

卒亦未嘗絕也至我

朝則清河何瀾與姪可及並有禦寇功而他無聞焉蓋天下之平久矣風俗與化移易將有詩書甲胄禮義于櫛緯武經文之士挺然傑出不僅若智勇之輩乘時以就功名已也志將略

漢

韓信淮陰人事具史記淮陰侯傳已載藝文志

齊

王敬則臨淮射陽人也僑居晉陵南沙縣年二十餘善拍張補刀戟左右宋前廢帝使跳刀高與白虎幢等

明帝卽位累官直閣將軍封重安縣子明帝崩蒼梧王復肆狂暴敬則以齊高帝有威名歸誠奉事常爲帝聽察蒼梧去來會楊玉夫等弑蒼梧將首投敬則敬則馳詣帝於牆上投進其首帝乃戎服出敬則從入宮襲殺領軍劉韞直閣將軍卜伯興等高帝受禪以佐命功遷右衛將軍建元元年出爲都督南兗州刺史封尋陽郡公歷隆昌延興進位太尉明帝卽位爲大司馬自以高武舊臣心懷憂懼乃起兵凡十日而敗時年六十四

舊志不載敬則南史以敬則爲臨淮射陽人南齊書作晉陵南沙人蓋但據其僑寓之地而未嘗考

其本貫也敬則生本射陽長爲南沙小  
吏故遂以南沙傳耳南史可據宜補入

隋

張孺字文懿自云清河人家淮陰好讀兵書鄉人郭子  
驥密引陳冠齋同父幾率子弟擊破之由是知名起  
家州主簿高祖作相授大都督平陳有功進位開府  
儀同三司封文安縣子入朝拜大將軍高祖宴之命  
陞御座曰卿可爲朕兒朕爲卿父今日聚集示無外  
也從楊素征江表有功進位上大將軍歷撫顯齊三  
州刺史開皇中爲行軍總管從征遼東諸軍多物故  
蕭衆獨至遷潭州總管卒有子孝廉

按隋書本作裔目錄誤作大裔淮安舊志皆不誤康熙志獨作大裔非是今改正

唐

張雄泗州連水人與里人馮宏鐸皆爲武定軍偏將數見疑於節度使時溥二人懼禍乃合兵三百渡江壁白下取蘇州據之戰艦千餘兵五萬自號天成軍以上元爲西州治臺城爲府旌旗衣服僭王者楊行密固揚州畢師鐸厚齎寶幣與雄連和雄率軍浮海屯東塘大順初以上元爲昇州詔授雄刺史未幾卒雄善馭衆人思之爲立廟宏鐸代爲刺史

馮宏鐸善騎射楊行密已得淮南與宏鐸納好時行密

大將田頽在宣州陰圖宏鐸宏鐸介宣歙間不自安而州數有怪大風發屋巨木飛舞州人駭曰州且易主宏鐸於是悉軍南向頽逆擊之宏鐸大敗收殘士入海行密懼其復振遣人迎犒東塘宏鐸舉軍盡哭行密擊斬不持兵入其軍執宏鐸手慰勉之遂以歸表爲淮南節度副使

吳

劉金楚州山陽人太祖引兵至天長金與高霸等悉衆來屬居三十六英雄之一官濠州團練使威名大震爲濠人所稱天祐二年卒太祖以其子仁規知濠州

仁規弟仁瞻仕南唐守壽州力拒周師見忠義傳子崇俊復刺濠州凡三世典濠梁爲一時之盛

南唐

劉崇俊字德修祖金事吳爲濠州刺史威振境上世典濠梁崇俊弱冠嗣父仁規位爲濠州刺史頗務仁惠嘗招集騎士得數百人被以精甲貢於金陵俄升濠州爲定遠軍遂拜節度使其子節尚元宗女太寧公主會壽州姚景死崇俊移鎮壽州卒年四十贈太尉謚曰威

宋

扈再興字叔起淮人也有膂力善機變每戰被髮肉袒徒跣揮雙刀奮呼入陳人馬辟易金人犯棗陽設伏掩擊金人大敗授神勁統制嗣是每戰輒捷斬其將從義又獲其副統軍衲撻達尋以病卒子世達亦以名將稱官至都統制

嵇安字寬濟祖大成自北海遷居漣水自幼習弓矢精騎射金末集義旅樹堡柵以護鄉井宋淮東置帥府承制授承節郎統義兵爲制將沿海巡檢使明斤堠禁侵略以安境內又畫策請於州增陂堰六十四所水旱有備流離全活不可勝計人皆德之中統間以疾

卒

按嵇安之居灌水自其祖大成始蓋土著已久不得謂之流寓矣宋元二史皆無安傳其行事不可得詳卽據舊志考之集義旅以護鄉井又云宋淮東置帥府承制授承節郎統義兵爲制將是安益譽官于宋矣義兵者淮北之人爲宋起義如魏勝忠義軍之類非爲金也是時淮北皆爲金有而人之心不忍忘宋故時集義旅以待宋師如安者其一也今郡志不列安于宋而列安于元蓋據其墓碑謂安卒于中統癸于至元故耳不知至元十六年元始滅宋中統正宋咸淳德祐間安子垕官於元其建碑叙事不得不用元之年號而安之出處則不可沒也今盡詳考而改正之

朱同宗鹽城人嘉定間中武舉狀元謀猷經畧重於一時見續文獻通考鹽城新橋北首有狀元坊爲同宗立也

元

嵇垕安東人安之子至元十三年從大丞相伯顏克襄  
陽取江南有戰功官鎮國上將軍移河東山西道宣  
慰司卒於官

明

王瑜字廷器山陽人以總旗隸趙王府永樂末常山護  
衛指揮孟賢等將謀弑立詣闕告變賢等伏誅授瑜  
遼海衛千戶仁宗卽位擢錦衣衛指揮同知戒同官  
事必白瑜然後行瑜能持大體不爲苛細宣德中進  
僉事充左副總兵代陳瑄守淮安董漕運累進左軍

都督僉事淮安瑜故鄉也人以爲榮在淮數年守瑄成法不變多善政正統四年議事入京卒

舊志勲爵戴瑜爲海州人明史瑜傳附陳瑄傳作山陽人今以正史爲據補入

劉寧字世安山陽人襲世職爲永寧衛指揮使勇敢善戰成化中累以功進都督僉事分守陽和亦思馬因寇大同寧連戰勝之時諸將多失利寧以功超遷都督同知尋改左副總兵協守大同著功北邊稱名將既乃佩平羌將軍印鎮甘肅屢有戰功進左都督以疾還京師宏治十七年卒贈廣昌伯

周正字元貞世襲大河衛指揮少游郡庠雅有文譽長

襲祖職用薦職總運遼洋忤倉曹罷歸復起履舊任  
條上便宜數事時河北山東盜阻漕舟正嚴兵守險  
盜不得肆陞歸德守備移疾歸正雖居武職而居家  
孝友素著都御史張文錦死大同之難家奴欲分所  
遺金正怒斥之俟其妻子歸焉歸德人立祠祀之所  
著有皇極經緯六壬秘集以子于德貴贈驃騎將軍  
都督僉事

周于德號蘭墩世襲大河衛指揮年十七爲郡諸生旣  
襲職遂應武試中嘉靖中武進士任福建都司歷陞  
南京前軍都督嘉靖乙卯倭犯浙江統兵護漕陞廣

西鎮守總兵值猶猶作亂勦撫有功復陞南京左府  
都督致仕歸晉榮祿大夫卒年七十七著有蘭墩詩  
集子尺亦中武進士歷官四川都司亦年七十七卒  
孫天祿中武舉歷官川廣叅將皆有名

按周氏本江都人宏治初周瓊官大河衛指揮僉  
事擢江北運糧把總充漕運叅將卒於官子孫世  
襲瓊子正遂爲淮安郡庠生以江都人官淮但當  
載在淮志職官不應入淮郡人物瓊子正旣入衛  
籍復列郡庠自子正以後方得稱爲淮人舊志旣  
載瓊子職官又再見于武績復三見于勳爵四見  
于列將未免重複今各歸于類  
使不錯雜庶覽者可無耽焉

王鳴鶴字羽卿其先鹿邑人居山陽世襲海州守禦所  
正千戶初爲海州儒學生旣承襲遂中萬曆壬午武

舉丙戌武進士授淮安衛指揮同知陞湖廣鄖襄守備撫定鄖陽軍變有功陞湖廣行都司僉事兵部考選天下將材第一陞陝西游擊尋陞甘肅永昌叅將哱賊勾西人內訌防守固原逐賊出塞陞貴州清浪叅將征播州楊應龍屢獲全勝又征邛水苗蕩平巴梁鬼計等十九塞征樂平斬阿禮生等陞狼山副總兵擒江洋大盜陳忠等又改管婺川偏橋騰衝諸叅將事皆斬獲有功陞五軍營左副將歷陞廣西掛印總兵官督驃騎將軍南京右府都督僉事鳴鶴橐鞬之餘不廢吟咏詩篇清麗居然勝流所著有登壇必

究若干卷

接鳴鶴雖籍海州實世居山陽所著登壇必究一書自署爲淮陰王鳴鶴可証也

國朝

何瀾字海若清河人順治乙未武進士授浦城營守備少爲人豪爽有智畧精騎射遂棄帖括究心孫吳家言官閩中時值海寇亂坼堠戒嚴人心風鶴身不解甲者三閱月設伏大輪山內藏精兵外示靜鎮寇不敢犯歷三年積勞成疾遂卒於官宜蒲入仕蹟傳

何可及字清河人康熙中邑諸生叔瀾官浦城時隸故提督侯馬征勦有功馬歿于王事其嗣侯傳檄

四方募其父麾下武臣子弟共滅賊可及遂走軍前  
効用累見擢用選銳直前連戰皆捷以功授潮州揭  
陽鎮守備在湖數年靖餘寇安反側一郡晏然未幾  
遂卒